

Carta nú uquie'e San Pablo lubee bene Roma enu nzeli arquí' Jesucristo

1 Li'á Pablo, enu sibi' lu Jesucristo, Diose ucañi li'á nú aca apóstol'nu para nú ixiule'a bedichia' nze'ca'nu lubee bene. ²Hasta hua'tu, bee bedichia' nze'ca quie' nze'tae lu ichi' Stichia' Diose nú uquie'e bee profeta'nu. ³Bee bedichia' nze'ca quie' rni equie cuenda' Jesucristo enu rnibiya' lua'ahua nu chenu ube'tanu lu iliulabe ungulanu lubee familia' tuxie David, ⁴pero equie cuenda' Espíritu Santo necanu lli'ñi Diose xne uhuañi zecanu lu eluti, nu chiqui' rlu'cunu poder.

⁵Nu equie cuenda' Jesucristo ucañi Diose li'á nú necaa apóstol'nu para nú ixiule'ahua stichia'nu lubee bene, nú chili arquí'beella stichia'nu nu zucu' beellae xne seca beella li'inu. ⁶Nu le'ca nuuhua nebacu'la Diose leta bee bene enu ucañlanu, para nú acahua bee bene' Jesucristo.

⁷Enze'e rquie'a carta quie' luyehua enu seca Diose, li'ihua bee enu nucua'a Roma, li'ihua enu ucañila Diose nú acahua bee bene'nu. Diose Pa liñibe cuna Jesucristo enu

rnibiya' lua'ahua ri'inu nú cha nze'ca lucuenda'hua nu ñia tsu arquí'hua.

Niarqui' Pablo nú challa Roma

⁸Rluti nia che'tsa lu Diose equie cuenda' Jesucristo lucuenda' yehua xne yebée luhua rni bee bene nú xa nzeli arquí'hua Jesucristo. ⁹Nu diquinu' arquia sibi'a lu Diose nu rixiule'a bedichia' nze'ca' lli'ñinu Jesucristo lubee bene, nu li'inu nediya'nu nú siempre rnacua lunu equie cuenda' li'ihua chenu rnacua lunu. ¹⁰Siempre rnacua lu Diose para nú nu' modo nzelabi'ya li'ihua tucu nú rri'á elliebacu'.

¹¹Xne nu' ana arquia nzelabi'ya li'ihua para nú ri'á elietsa luhua lu cuenda' Stichia' Diose, che tsuta'lá arquí'hua lu stichia'nu. ¹²Nu para nú ri'ihua elietsa lua nu ri'á elietsa luhua equie nú xa nzeli arquia'ahua Diose nu scua dua'ahua ana arquí'sa'ahua. ¹³Bee sa'a enu nzeli arquia'ahua Jesucristo niarquia nu ri'ihua beya' nú huaxi bese niarquia nzelabi'ya li'ihua, para nú dalalá bee bene enu chili arquí' Stichia' Diose letahua tucu nú unga lubeelá

bee eyeche elu uya'la pero hasta nee lá llucha yela bi'ya li'ihua.
¹⁴Xne cuendaa neca nú ixiule'a Stichia' Diose lu titse bee bene, sia lubee bene griego urre lubee bene enu la neca bee bene griego, lubee bene enu laca urre lubee bene enu reca. ¹⁵Enze'e chiqui' nu' ana arquia nzelabi'ya li'ihua para nú ixiule'a bedichia' nze'ca' Diose luhua enu nucua'a eyeche Roma.

Elurnibiya' nú rlu'cu Stichia' Diose

¹⁶Nu la tua rixiule'a bedichia' nze'ca' Jesucristo. Xne bedichia'cua' rlu'cu poder' Diose. Para nú yebee bene enu chili arquí li'inu tsila'a beella, nu rluti bee bene Israel nu chelá bee bene enu la neca bee bene Israel. ¹⁷Xne equie cuenda' bedichia' nze'ca' Jesucristo rri'i bene beya' nu lunú nze'li arquí bene Jesucristo la lu'cu bene dula lu Diose tucu nú nequie lu ichi' Stichia' Diose: “Nu bee bene enu la lu'cua' dula equie nú nze'li arquí'beella li'inu huañi beella diqui tiambu.”

Ye bee bene necha rri'i

¹⁸Lia'ahua nediya'ahua nú enza liñibe nze'ta castiya' Diose nu chiqui' juerte zeca bee bene enu la zucu' stichia'nu nu la ri'i tucu nú necane nu equie nú nehuañi beei scua rca nucua' nú chulu bee bene Stichia' Diose. ¹⁹Nu li'ibeei nediya'la'beei nú nu' Diose, xne ulube'nu lubeei nú neli nu' Diose. ²⁰Añinzuca nú la lañi' bene Diose pero desde chenu ungache' iliulabe rlaña'ahua ye nú ureche'nu, nu equie cuenda' ye nú ureche'nu

rria'ahua beya' nú leca xunga laxu poder nú rlu'cunu, nu li'inu necanu Diose, enze'e leca modo nú cachi' bene nú nu' Diose. ²¹Añinzuca nú nediya' bee bene nú nu' Diose pero la lu'cu bene ula'na lu Diose tucu nú rialane nu la dete' bee bene che'tsa lunu, sino que rri'itsia bee bene puro beenú necha neca, nu che neca xi neca nú nucua'abeei leta rula'. ²²Rnibeei nú chiqui' recabeei pero máse netundubeei. ²³Xne luhuare nú lu'cu bee bene ula'na lu Diose liñibe enu leca xunga ati, li'ibeei rlu'cubeei ula'na lubee diose enu la nehuañi, enu nuya' forma' bene, cuna bee nañi xi neca bella cuna iñi, cuna bee nañi enu rlu'cu tacu cuchiu'.

²⁴Enze'e utsana' arquí Diose li'ibeei nú necha rri'ibeei, nu netú na nú rri'inubeei sa'beei, ²⁵luhuare nú chenalabeei Stichia' Diose nú neli neca, a'la nzenalabei bedichia' nú la neli neca. Nu rlu'cubeei ula'na lubee nú ureche' Diose, nu la lu'cubeei ula'na lu li'inu enu ureche' bee nucua', nu lu li'inu riala nú lu'cu bee bene ula'na diqui tiambu. Amén.

²⁶Enze'e utsana' arquí Diose li'ibeei nú rri'ibeei nú necha neca. Nu huaxi bee una'a la ria' tucu nú neca beenchu una'a, sino que niarquí' beenchu le'ca sa' una'a beenchu. ²⁷Le'ca scua nu' bee niyu enu la na'tsea' bee una'a, sino que riu'u arquí'beei le'catsia sa' niyubeei, nu puro nú necha neca rri'ibeei elliebacu' lusa'beei. Niyu cuna niyu rri'i beei nú netú neca. Che le'ca li'ibeei rla'na beei castiya nú zecabeei.

²⁸Nu lunú lá ri'i caso beei
Diose, enze'e utsana' arquí'nu
beei lu elliebacu' nú necha neca
rri'ibeei para nú ri'ibeei lunú la
yala ri'ibeei. ²⁹Puro nú necha neca
rri'ibeei, rlu'cubeei stucu una'a nu
rlu'cubee una'a stucu niyu, huaxi
nú necha neca rri'ibeei, rle'beei
lu'cusca'lábeei stene'beei, ríaa
arquí'beei, ruuti beei bee bene,
rliunubeei bee bene, nezequiebeei,
puro nú necha neca nzucu lubeei
rri'ibeei, nu puro rnibeei lu
cuenda' bee bene. ³⁰Le'ca se'tabeei
bee bene, nu rlebeei lu Diosé,
la lu'cubeei ula'na lubee bene,
secabeei nú chiqui' recabeei, nu
nelliñabeei, ³¹chiqui' nzitibeei nu
la tsalubeei stichia'beei, nu lecalí
ti zecabeei, nu la hua'a arquí'beei
bee bene. ³²Nediya'la'beei nú uni
Diose nú bee bene enu rri'i scua
rqui'ña nú zecabeei, castiya' Diosé,
añinzuca nú nediya'beei nucua' nu
chu rri'isca'lábeei scua, nu hasta
ña nzu arquí'beei chenu rlañi'beei
nú stucu bee bene rri'i scua.

**Rlualu Diosé tucu nú necane
lu cuenda' bee bene**

2 Enze'e la yala nú tsequichia'lu
bee bene, tunu rri'ilu scua
sequichia'lu le'catsia li'ilu, xne
rri'ilu tucu nú rri'ibeei. ²Pero
lia'ahua nediya'ahua nú tucutsia
Diose rlualu tucu nú necane chenu
rdete'nu castiya lubee bene enu rri'i
beenú necha neca, nú unila luhua.
³Nu li'ilu enu sequichia' nú xneca
rri'i bee bene nu le'ca esquie rri'ilu,
la ri'ilu elliebacu' nítia tsila'alu
lu castiya' Diosé. ⁴Li'ilu rluachulu
nú ñia rri'i Diosé lulu, rluachulu

lunú rua'a arquí' Diosé li'ilu, nu
rlu'cu arquí'nu li'ilu nu la ri'ilu
beya' nú lunú rlu'cu arquí'nu li'ilu
scua. necane nú rlu'culu tiempo
nú che'e arquí'lu lu stulalu. ⁵Pero
li'ilu chiqui' nzitilu nu la niarquí'lu
che'e arquí'lu lu stulalu, nu le'catsia
li'ilu rri'ilu nú recahuaxilá stulalu
para bichia chenu dete' Diosé
castiya bee bene nu hualu Diosé lu
cuenda' bee bene li'ínu enu rlualu
tucu nú necane. ⁶Bichia ze'e dete'
Diose lunú riala cada tucua bene
lunú xneca uri'illa. ⁷Nu bee bene
enu la tsana' arquí' nú rri'i nze'ca
nu rla'na eluxene nú nu' liñibe, nu
rla'na nú huañi nze'ca lu Diosé para
nú lu'cu bee nze'e cuerpo nú la
nitilua' nu dete' Diosé elunehuañi
nú leca xunga laxu lubee nze'e.
⁸Pero bee bene enu la zucu' Stichia'
Diose chiqui' rlenu lubee nze'e nu
dete'nu castiya beei, xne luhuare nú
chenalabeei stichia'nu nú neli neca,
nzenalabeei inziu nú necha neca.
⁹Chiqui' nehuana zeca beei nu cuu
arquí'beei lunú rri'i beei nú necha
neca, sia bee bene Israel nusia bee
bene enu la neca bee bene Israel.
¹⁰Pero yebee bene enu rri'i nú neca
nze'ca ñia nzu arquí' Diosé lubeei,
nu rri'ínu nú la chenu arquí'beei nu
chu'ubeei liñibe, sia nú necabeei
bee bene Israel nu sia nú lacabeei
bee bene Israel.
¹¹Xne teriallu rri'i Diosé tucu
nú necane luye bee bene. ¹²Yebee
bene enu la chulu ley' Diosé nú
udete'nu lu Moisés nu rri'i dula, la
chiulue lu cuenda'lla tucu nú rni
ley cua', pero ye bee bene enu nu'lu
ley cua', tucu nú rni ley cua' esquie
chíu'ulue lu cuenda'lla. ¹³Xne la

neca lunú riene'tsia bee bene ley cua' nú la lu'culla dula lu Diose sino que bee bene enu sucu' nú rni ley cua' bee nze'e neca enu la lu'cu dula lu Diose. ¹⁴Pero bee bene enu la neca bee bene Israel nu rri'i nú neca nze'ca sin nú chulubeei ley cua', nu rri'ibeei tucu nú rni ley cua' sin nú chulubeei, sino que elliebacu' e'cubeei xiu'u nú neca ley' beei, ¹⁵xne lunú xneca nehuañihua rlube' nú elliebacu'hua xiu'u ta nú neca nze'ca nu ta nú la neca nze'ca rri'ihua, luhuare nú rlu'cuhua ley cua', nu le'ca mismo li'ibeei ri'ibeei beya' chenu rri'i nze'cabeei urre chenu la ri'i nze'cabeei. ¹⁶Scua aca bichia chenu hualu Diose lu cuenda' ye beenú a'chi' rri'i bee bene equie cuenda' Jesucristo tucu nú rni stichia'nu nú rixiule'a.

Bee bene Israel cuna ley

¹⁷Nee li'ihua enu neca bee bene Israel, nelliñiahua nú necahua bee bene' Diose nu cuna nú recahua ley nú udete' Diose lu Moisés. ¹⁸Nu rnihua nú nediya'hua xa niarqui' Diose nú huañihua nu equie cuenda' ley'nu rri'ihua beya' ta nú neca nze'ca ri'ihua. ¹⁹Nu secahua nú acahua nihua lubee bene enu laca ley cua', cuna lubee bene enu lachulu Stichia' Diose. ²⁰Secahua nú li'ihua acahua zete'hua bee bene enu lecalí xi reca cuna bee bene enu lle'natsia reca, xne equie cuenda' ley cua' recahua nu nu'luhua ye nú neli neca. ²¹Pero scua tucu nú nehuañihua, ÷xiquienú mejora la zete'xuhua li'ihua nú xneca huañihua luhuare nú rnihua lubeelá bee bene nú xneca huañi

beei? Xne li'ihua rnihua nú la neca nze'ca nú ri'i bene eluhuana', ÷nu xiquie nú rri'ihua eluhuana'? ²²Rnihua nú la neca nze'ca nú lu'cu niyu stucu una'a nu la lu'cu una'a stucu niyu, ÷nu xiquie nú rri'ihua scua? Le'ca rana arqui'hua bee diose enu ureche' bee bene nu, ÷xiquie nú rcachi'hua liñi indu elu nchiucu' bee diose cua'? ²³Chiqui' nelliñiahua nú recahua ley pero sa'na netúhua Diose equie nú la zucu'hua nú rni ley. ²⁴Enze'eca rni lu ichi' Stichia' Diose: "Bee bene enu laca bee bene Israel se'ta beei Diose equie cuenda' nú rri'ihua."

²⁵Neli nú sibi' nú rquie seña elunecachi' bee niyu, tunu zucu' bee bene ley nú udete' Diose lu Moisés, pero tunu la zucu' bee bene tucu nú rni ley cua' lecaxi zibi' nú nequie seña elu necachi' bee bene che. ²⁶Pero tunu tucu bene enu la nequie seña'cua' elu necachi', nu sucu'lla tucu nú rnibiya' ley, necalla xi neca tucu bene enu nequie seña, mase nú la nequie seña'lla. ²⁷Nu bee bene enu la chulu ley' Diose nu sucu' stichia'nu nu nehuañi xi nehuañi enu nu'lu ley, che mase nú la nequie seña'lla tucu nú rnibiya' ley, pero lunú nu'lulla Stichia' Diose, che lunú xneca nehuañilla ri'ihua beya' nú la nehuañihua tucu nú riala nú huañihua, equie nú la ri'ihua tucu nú rnibiya' ley' Diose mase nú nu'luhua ley cua' nu nequie seña'hua. ²⁸Xne la neca lunú rala bene lu iliu Israel nú necalla bene Israel, nu la neca lunú nequie seña'lla nú necalla bene Israel ante Diose. ²⁹Sino que enu neli neca bene Israel neca bee enu

diquinu' arquí' sucu' stichia'nu nu la neca nú nequietsia señaalla, nu ni' nú sucu'lla beelá bee custumbre nú rlu'cu bee benecua', sino que necane nú nzu Espíritu Santo cuna bee bene, nu bee bene enu nehuañi scua Diose neca enu sucu' aya li'illa, nu la neca bene enu sucu' aya li'illa.

3 Nu, ¿xi sibi' nú neca bene bene Israel? ¿Nu xi sibi' nú rquie señaacua' bene? ²Chiquí' neca equie nú neca bene bene Israel ye modo, xne rluti udeté' Diose stichia'nu lubee bene Israel. ³Neequie la ri'ihua elliebacu' nú lunú nu' bee enu la chenala Stichia' Diose, chequie la tsalua' Diose stichia'nu tucu nú unilanu. ⁴Xne Diose leca xunga xe'enu stichia'nu, mase nú ye bee bene iliulabe nequichia' pero Diose leca xunga nequichia', tucu nú rni tucu luhuare lu stichia'nu:

Yebee bene lañi' nú li'ilu
sa'alulu stichia'lu,
nu lecati niquiya xi niquiya lu
cuenda'lu.

⁵Pero nu' bee bene iliulabe enu rri'i elliebacu', nú equie cuenda' dula nú rri'illa, scua rlube'lla nú ñia neca Diose, nu ¿xiquie nú necha neca Diose nu rdeté'nu castiya bee bene? ⁶¡Lacane scua! Xne tunu necha neca Diose, ¿xneca modo nú hualunue lu cuenda' bee bene iliulabe che?

⁷Xne te zucua'ahua nú tunu beenú la neli rnía sibi'i para nú lu'culá bee bene ula'na lu Stichia' Diose, che leca' modo nú ni Diose nú rlu'cua dula. ⁸Nu le'ca teri'ila'ahua beenú necha neca para nú cha nze'cae lu cuenda'ahua, tucu

nú rta' quiya bee bene li'á, nú setea bee bene, la chenu arquia'ahua nucua', xne Diose dete' castiya bee bene enu rni scua, nu scua riala zeca beei.

Lecati neca bene nze'ca

⁹Bueno che, ¿xie' lianú neca'ahua bee bene Israel nú neca'ahua bene nze'ca luquela bee bene enu laca bene Israel la? ¡Pero la acane esquie! Xne sia bee bene Israel nu sia bee bene enu laca bee bene Israel rlu'cu dula. ¹⁰Tucu nú rni lu ichi' Stichia' Diose elu rni:

Leca ni' tucu bene nze'ca, pero
ni' tuculla leca.

¹¹Ni' tucu bene la yene',
nu ni'tucu lecati la'na Diose.

¹²Yebee bene utsana' arquí' Diose,
nu yella rri'illa nú necha neca,
lecalí ti rri'i nú neca nze'ca, leca
ni' tuculla.

¹³Xi neca tucu eluhua nú na'la
ru'u neca bene,
nú puro nú laca neli rni bee
bene,
nu bee bedichia' nú rni bee
bene neca xi neca benenu'
be'la.

¹⁴Puro bedichia' nú necha see
xiu'u ru'ubeei,
nu puro bee bedichia' chi'qui'
rnibeei.

¹⁵Nu nzucutsia lubeei nú útibeei
bene.

¹⁶Nu catse elu nzuebee puro nú
necha neca rri'ibeei,
nu nehuana seca bee bene
rri'ibeei.

¹⁷La chulubeei nú huañi nze'ca
beei tucu nú rialane para nú
nzuxe arquí'beei.

¹⁸ Nu ni' la za' arquí'beeí nú
lliquibeeí Diose.

¹⁹ Nediya'ahua nú ye nú rni ley
necane para bee bene enu sucu'e,
para nú lecati ni nú la chulu dula,
sino que yebée bene ri'ibeya' nú
rlu'culla dula ante Diose. ²⁰ Xne la
neca nú sucu'tsia bee bene ye nú
rni ley nú secalla nú la lu'culla dula
lu Diose sino que ley cua' sibi' para
nú ri'i bee bene beya' nú rlu'culla
dula.

**Rlu'cu cuenda Diose bene equie
nú nzeli arquí' bene Jesucristo**

²¹ Pero nee ulube'la Diose inziu'nu
lua'ahua para nú xneca ya'na
nze'ca'ahua lu Diose la necane
equie nú ria'ahua lunú xa rnibiya'
ley sino que equie cuenda' ley cua',
nu equie cuenda' nú uquie'e bee
profeta' Diose, ²² rria'ahua beya'
nú Diose rlu'cu cuenda lia'ahua,
nú la lu'cua'ahua dula equie nú
nzeli arquia'ahua Jesucristo, scua
rri'inu luyebée bene enu nzeli arquí'
li'inu. ²³ Xne yebée bene rlu'cu dula,
nu lecati enu la lu'cu dula ante
Diose. ²⁴ Pero lunú chiquí' nze'ca
Diose, enze'e uri'ilanu perdona
ye stula'ahua, sin nú dixiu'ahua
lunu, sino que Jesucristo udixiula
equie cuenda' stula'ahua chenu
ungutinu lu cruse. ²⁵ Diose uxe'la
Jesucristo lu iliulabe para nú equie
cuenda' rene'nu nú uti'chianu
ri'inu perdona bee bene iliulabe,
nu neca nucua' para bee bene enu
chili arquí' Jesucristo, scua rlube'
nú ye nú rri'i Diose neli necane.
Nu tunu hasta hua'tu lá ri'inu elu
usticia equie bee dula nú rlu'cu bee
bene, necane lunú rlu'cu arquí'nu

bee bene. ²⁶ Para nú nee nu' modo
lube'nu lubee bene nú ñia necanu
nu para nú ri'i bee bene beya' nú
li'inu rri'inu tucu nú necane enze'e
rri'inu perdona stula bee bene enu
nzeli arquí' Jesucristo.

²⁷ Nee ¿xi equie zucu' aya'ahua
lia'ahua? Leca xine, xne la necane
equie cuenda' nú sucua'ahua
nú rni ley nú ri'i Diose perdona
lia'ahua sino que necane nú nzeli
arquia'ahua Jesucristo. ²⁸ Enze'e
nediya' nze'ca'ahua nú rri'i Diose
perdona stula bee bene equie nú
nzeli arquí' bee bene Jesucristo nu
lanecane equie cuenda' nú zucu'
bee bene nú rni ley.

²⁹ ¿Xie' Diose necanu Diose lubee
bene Israel tsia? ¿Nu lacanu Diose
lubee bene enu laca bee bene Israel
chela? Pero li'á nia luhua nú li'inu
necanu Diose luye bee bene iliulabe.
³⁰ Xne nu' tucutsia Diose, nu li'inu
rri'inu perdona bee bene enu nzeli
arquí' Jesucristo, sianu rlu'culla
seña nú rnibiya' ley nú rquie bee
bene Israel, urre la lu'culla seña
cua'. ³¹ La ri'ihua elliebacu' nú
rluachu'ahua ley equie nú nzeli
arquia'ahua Jesucristo sino que
equie nú nzeli arquia'ahua li'inu
sucua'ahua nú rni ley.

Xneca uchili arquí' Abraham Diose

4 Li'ihua nediya'hua nú xneca
unga lu cuenda' Abraham
bene'ahua enu udetela, li'illa enu
rlutila uquie seña nú rquie bee bene
Israel. ² Tunu aca nebacu' Abraham
nú la lu'culla dula equie beenú
uri'illa, che nu' modo nú azucu'
ayalla li'illa lubee bene, pero lu
Diose leca modo ari'illa scua. ³ Pero

Stichia' Diose rni: "Xne uyali arqui' Abraham Diose, enze'e ubacu' Diose li'illa xi neca tucu enu la lu'cu dula." ⁴Chenu rri'i tucu bene riña', dimi nú riaxulla la necane nú lia rati'llae sino que rri'illa anae equie riña' nú uri'illa. ⁵Pero para nú ri'i Diose perdona stula bee bene, leca modo nu ni bene nu aca perdonalla equie beenú uri'illa, sino que equie nú uchili arqui' bene Jesucristo enze'e ubacu' Diose li'illa nú la lu'cua'lla dula. ⁶Le'ca uni David lu cuenda' bee bene enu uri'i Diose nú la lu'cu'a dula, nu la necane equie beenú xi uri'illa, ⁷nu unilla:

Ñia neca lu cuenda' bee bene
enu uri'ila Diose perdona
stula, nu uchilalanu stula.

⁸Ñia neca lu cuenda' bee bene
enu nebacu'la Diose, nú la
lu'cua' dula.

⁹Lá ni David nucua' para bee bene Israel enu nequie seña, sino que unilla bee bedichia' quie' lu yebee bene. Tucu nú uni'la'ahua nú Diose ubacu'la Abraham nú la lu'culla dula xne uchili arqui'lla li'inu. ¹⁰Nu chenu ubacu' Diose li'illa la lu'culla seña nú rquie bee bene Israel, ante nú quie seña'cu' Abraham nebacu'la Diose li'illa nú la lu'culla dula. ¹¹Nu chenu ubacu' Diose Abraham nú la lu'culla dula, che luze'elá uquie seña'cu' li'illa, xne seña'cu' neca nú nebacu'la Diose li'illa nú la lu'culla dula equie nú uchili arqui'lla li'inu. Scua neca Abraham pa' ye bee bene enu nzeli arqui' Diose, mase nú la nequie seña nú rquie bee bene Israel li'illa, pero lunú nzeli arqui'beella Diose nebacu'lanu li'ibeella, nú la

lu'cu beella dula. ¹²Nu le'ca neca Abraham pa' bee bene enu nequie seña nú rquie bee bene Israel, nu nzeli arqui'beella Diose tucu nú uyali arqui' Abraham, ante nú quie seña li'illa.

**Rialu nú ucuaqui u'na Diose equie
nú nzeli arqui' bee bene li'inu**

¹³Chenu ucuaqui u'na Diose lu Abraham cuna lubee bene enu nzeli arqui' Diose, tucu nú uyali arqui' Abraham nú dete'nu nú yucu beella iliulabe xi neca tucu erencia. Lá cuaqui u'na Diose nucua' lu Abraham, equie nú uzucu'lla nú rni ley, sino que necane lunú uchili arqui'lla Diose. ¹⁴Xne tunu bee enu sucu'tsia ley ati' erencia cua', lecaxi sibi' nú nzeli arqui' bee bene Diose, le'ca la zibi' nú ucuaqui u'na Diose lu Abraham che. ¹⁵Pero lacane scua, xne ley neca para nú dete' castiya bee bene pero elu leca ley leca modo nú ni bee bene nú la zucu' bene nú rni ley.

¹⁶Enze'e chenu ucuaqui u'na Diose lu Abraham nú dete'nu nú ucuaqui u'nanu lu ye bee bene enu nzeli arqui' li'inu, tucu nú udete'nue lu Abraham scua ucuaqui u'nanu lu Abraham xne uchili arqui'lla li'inu, nu la necane nú ucuaqui u'na Diose nucua' para bee bene enu sucu'tsia ley sino que necane para bee bene enu nzeli arqui' Diose, tucu nú uyali arqui' Abraham Diose, mase nu la chulu beella ley, nu scua Abraham neca pa' ye'ahua. ¹⁷Tucu nú rni lu ichi' Stichia' Diose lu cuenda' Abraham, elu rni: "Li'ilu acalu pa' huaxi bee bene iliulabe." Nucua' neca nú ucuaqui u'na Diose lu Abraham, nu uchili arqui'lla nú uni

Diose lulla, li'inu enu rri'i nú rehuañi bee benenguti nu rninu equie cuenda' beenú lecasca' lu iliulabe quie' xi neca nú nu'lane.

¹⁸Añinzuca nú nediya' Abraham nú leca modo nú lu'culla endu', pero chenu uni Dios lulla nú lu'culla endu' che ita uyali arquí'lla nú uni Dios lulla scua, neca Abraham “pa' ye bee bene”, enu nzeli arquí' Dios, tucu nú uni Dios lu Abraham: “Scua aca huaxi bee lli'ñilu.” ¹⁹Nu uyali arquí' Abraham nú uni Dios lulla nú lu'culla endu', nu nzalalla casi tucu ayu'u lana, nu unguxulalla nu le'ca esquie una'lla Sara, pero lá tsuchiucu arquí'lla lunú uni Dios lulla. ²⁰Nu lá za' arquí'lla núla yalu tucu nú ucuaqui u'na Dios lulla sino que diquinu' arquí'lla uyali arquí'lla nú uni Dios lulla, nu udete'lla che'tsa lunu. ²¹Chiquí' nzuta' arquí' Abraham nú chiquí' reca Dios rí'i tucu nú ucuaqui u'nanu lulla.

²²Enze'e nebacu'la Dios Abraham nú necalla tucu bene enu la lu'cu dula xne uchili arquí'lla li'inu.

²³Nu elu rni nú Dios nebacu'la Abraham nú necalla tucu bene enu la lu'cu dula, lunú uyali arquí'lla li'inu, láninu lu cuenda'tsia Abraham, ²⁴sino que le'ca uninu nucua' lu cuenda'ahua, xne nzelila arquia'ahua Dios, che nebacu'lanu lia'ahua nú la lu'cua'ahua dula, li'inu enu urí'i nú uhuañi zeca Jesucristo lu eluti. ²⁵Jesucristo enu unguti equie stula'ahua nu uhuañi zecanu lu eluti nu equie cuenda' li'inu la lu'cua'ahua dula lu Dios.

Xa seca bene chenu la lu'cua' bene dula lu Dios

5 Nu equie nú nzeli arquia'ahua Dios la lu'cua'ahua dula

lunu, nu equie cuenda' Jesucristo ñia nzu arquí' Dios lua'ahua. ²Xne lunú nzeli arquia'ahua Jesucristo nu' modo xneca riña'ahua lu Dios, nu nzuta' arquia'ahua lunú nzeli arquia'ahua nu ñia nzu arquia'ahua, nu riña'ahua lu ellie'e elu nzucu Dios liñibe. ³Nu la necane equie cuenda'tsia nucua' nú ñia nzu arquia'ahua sino que le'ca equie nú nehuana se'ca'ahua, xne nediya'ahua nú chenu nehuana se'ca'ahua másela rlu'cua'ahua paciencia. ⁴Nu lunú rlu'cua'ahua paciencia aca'ahua riquia'ahua lunú xi ze'ca'ahua, nu equie nú rriquia'ahua nzucu lua'ahua nú riña'ahua lu Dios. ⁵Nu lunú nzucu lua'ahua nú riña'ahua lu Dios neli aca nucua', xne nediya'ahua nú seca Dios lia'ahua xne nzu Espíritu Santo nú uliqui'nu cuna lia'ahua.

⁶Ante nehuañia'ahua sin nú ria'ahua beya' xneca tsila'a Dios lia'ahua lu stula'ahua, pero chenu uríña bichia nú ube'ta Jesucristo unguti equie cuenda'ahua nú neca'ahua bene enu rlu'cu dula.

⁷Nediya'ahua nú neriña' nú ti zela ati equie cuenda' stucu bene, pero ni' lu cuenda' tucu bene enu rri'i nze'ca urre nu' ti zela ati equie cuenda' stucu bene nze'ca.

⁸Pero ulube' Dios nú chiquí' secanu lia'ahua enze'e unguti Jesucristo equie cuenda'ahua chenu uria'ahua puro dula. ⁹Nu nee nú la lu'cua'ahua dula equie cuenda' rene nú uti'chia Jesucristo lu cruse chenu ungutinu, neli nú la zeca'ahua castiya' Dios equie cuenda'nu. ¹⁰Xne chenu rri'sca'ahua lunú la yu' arquí'

Diose che uxe'lanu lli'ñi e'cunu lu iliulabe unguti lu cruse equie cuenda'ahua nu scua uyala arquí'nu lua'ahua enzaláquie' nee nú uyala arquí' Diosé lua'ahua. ¹¹Nu nee nú nzu Jesucristo cuna lia'ahua, enze'e chiquí' ñia nzu arquia'ahua dete'ahua che'tsa lu Diosé equie cuenda' Jesucristo enu rnibiya' lua'ahua, xne equie cuenda' li'inu uyala arquí' Diosé lua'ahua.

Adán nu Jesucristo

¹²Scua necane xne equie cuenda' tucu bene uyu'u dula lu iliulabe, nu equie cuenda' dula uyu'u eluti, nú rati ye bee bene xne ye bee bene uri'i dula. ¹³Chenu lecasca' ley nú udete' Diosé lu Moisés añinu'ca dula lu iliulabe, pero lunú leca ley hua'tu enze'e la ri'i caso bee bene nú rri'illa dula. Che leca modo zeca bene castiya tucu nú rnibiya' ley. ¹⁴Pero añica unguti beella hasta tiembu' Adán nu hasta tiembu' Moisés, añinzuca nú lá ri'i beella sa' dula nú uri'i Adán, nu tiembu ze'e unga Adán tucu seña equie cuenda' tucu bene enu nzu nú nze'ta.

¹⁵Nu laca iguale dula nú uri'i Adán, cuna nú chiquí' rri'i nze'ca Diosé lubee bene, nu equie cuenda' dula nú uri'i tucu bene ye bee bene rati, pero le'ca equie cuenda' tucu bene huaxi bee bene tsila'a Diosé, nu li'inu necanu Jesucristo, nu equie cuenda'nu lia tsila'a Diosé lia'ahua. Nu lunú uri'i Jesucristo másela seca para huaxi bee bene. ¹⁶Laca iguale dula nú uri'i Adán cuna lunú chiquí' rri'i nze'ca Diosé. equie cuenda' tucutsia dula, uyu'u castiya para bee bene pero equie

cuenda' Jesucristo nu' modo tsila'a bee bene mase nú uri'illa huaxi dula. ¹⁷Equie cuenda' dula nú uri'i Adán, uyu'u eluti nú rati ye bee bene, pero uri'i Diosé ana lunú uri'i Adán equie nú uri'i Jesucristo nú sila'a ye bee bene enu seca nú equie cuenda' Jesucristo la lu'cua'lla dula ante Diosé nu lu'culla nú huañilílla lu Diosé.

¹⁸Nu scua tucu nú uyu'u eluti xi neca castiya para ye bee bene equie dula nú uri'i Adán, le'ca esquie lunú uri'i nze'ca Jesucristo tsila'a bee bene nu huañilí bee bene liñibe lu Diosé. ¹⁹Xne lunú né zucu' tucu bene nú uni Diosé ye bee bene rlu'cu dula, pero le'ca scua lu cuenda' tucu bene enu uzucu' nú uni Diosé nebacu' Diosé bee bene nú la lu'cu bene dula ante lunu.

²⁰Udete' Diosé ley'nu lu Moisés para nú lu cuenda' ley cua' ri'i bee bene beya' nú rri'i beei dula, nu elu chiquí' uri'i bee bene dula másela uri'i nze'ca Diosé nu uri'inu perdona bee bene ze'e. ²¹Hua'tu unibiya' dula lubee bene nu equie cuenda' dula cua' rati bee bene, pero nee lunú chiquí' seca Diosé lia'ahua equie nú chiquí' nze'canu nebacu'nu lia'ahua nú la lu'cua'ahua dula, nu liqui'nu nú huañilia'ahua liñibe lu Diosé equie cuenda' Jesucristo.

Neca xi neca nú unguti'la'ahua lu dula

6 La ri'ihua elliebacu' nú nia nú ri'ila'ahua dula para nú ri'i nze'calá Diosé lua'ahua. ²Lacane scua, xne neca xi neca nú unguti'la'ahua lu dula, nu

leca modo nú ri'ilá'ahua dula.

³Xne chenu uri'nza'ahua equie cuenda' Jesucristo, neca xi neca nú ungu'la'ahua cuna li'inu. ⁴Chenu urinza'ahua neca nucua' xi neca nú uhuachi'la'ahua cuna Jesucristo nu ungu'la'ahua cuna li'inu para nú scua tucu nú uhuañinu lu eluti, cuna poder' Diose le'ca nu' modo lu'cua'ahua elunehuañi nú necuqui neca nu huañia'ahua tucu nú niarqui' Diose nú huañia'ahua.

⁵Nu tunu neca tucunecatse'ahua cuna Jesucristo lu eluti'nu, le'ca scua tucu nú uhuañi zecanu lu'cua'ahua stucu elunehuañi nú necuqui neca. ⁶Chenu unguti Jesucristo lu cruse, ungutinu equie ye nú neca'ahua hua'tu chenu lasca' chulua'ahua li'inu, nu hasta lu'tsia ulaxu nú neca'ahua hua'tu xne leca' modo nibiya'lá dula lua'ahua. ⁷Xne bene enu ungu'la' lu cuenda' dula la nibiya' dula lu nze'e. ⁸Nu equie nú unguti Jesucristo equie cuenda' stula'ahua, unguti'la'ahua lu dula, nu le'ca nediya'ahua nú huañia'ahua cuna li'inu. ⁹Xne nediya'ahua nú chenu uhuañi zeca Jesucristo lu eluti, leca' xunga atinu nu la nibiya' eluti lunu. ¹⁰Jesucristo ungutinu tucutsia bese equie cuenda' stula bee bene nu nee nehuañinu para nú zucu' ayanu Diose. ¹¹Le'ca scua utsu arquí'hua nú ungu'la'hua lu dula nu nehuañihua para nú zibi'hua lu Diose, equie nú neca tucu necatselahua cuna Jesucristo.

¹²Enze'e diqui nú nehuañihua lu iliulabe quie' la zelahua nú nibiya' dula luhua, nu la zelahua nú ri'i elliebacu' nú necha neca ana luhua

para nú ri'ihua nú necha neca. ¹³La dete' cuendahua li'ihua lu dula para nú ri'ihua nú necha neca, mejora uzu'cu'hua nú rni Diose xi neca tucu bene enu unguti nu uhuañi zeca para li'inu, nu uzelahua nú nibiya'nu luhua para nú ri'ihua nú neca nze'ca. ¹⁴Nu nee la nibiya' dula luhua xne la nibiya' ley luhua sino que nehuañihua lu eluseca' Diose.

¹⁵La nia luhua lunú nzenala'ahua eluseca' Diose nu nu' modo ri'ila'ahua dula, xne la nibiya' ley lua'ahua xne lacane scua. ¹⁶Li'ihua nediya'hua nú tunu nu' tucu enu rnibiya' lua'ahua che rqui'ña nú zucua'ahua stichia' nze'e. Nu tunu rnibiya' dula luhua che yalahua castiya. Pero tunu sucu'hua Stichia' Diose che huañi nze'cahua. ¹⁷Pero che'tsalá Diose nú mase unibiya' dula luhua hua'tu, pero nee diquinu' arquí'hua nzenalahua Stichia' Diose. tucu nú ungalahua. ¹⁸Nu nee nú la nibiya' dula luhua nehuañilahua para nú ri'ihua tucu nú niarqui' Diose. ¹⁹Rnia luhua puro bee bedichia' nú rri'ihua beya' nú xi rni, xne nediya' nú neriña' ri'ihua beya' bee nucua' tucu nú unibiya' dula luhua hua'tu chenu uri'ihua beenú la zibi' cuna beenú necha neca, nee uzelahua nú nibiya'li Diose luhua para nú ri'ihua nú neca nze'ca, nu uhuañihua tucu nú niarqui'nu nu huañihua.

²⁰Chenu unibiya' dula luhua lá chenu arquí'hua nú ahuañi nze'cahua. ²¹Pero, ¿xi uri'ihua ana equie beenú necha neca uri'ihua tiambu ze'e, nu neequie rtu'hua equie cuenda' beenú necha neca

cua' uri'ihua? Xne nediya'hua nú equie cuenda' nucua' nze'ta castiya' Diose. ²²Pero nee nú la nibiya' dula luhua nu sucu'hua nú rni Diose, nucua' ñia neca xne scua nu' modo huañihua tucu nú niarqui' Diose nú huañihua nu añica lu'cuhua elunehuañi nú leca xunga laxu lunu. ²³Xne lunú rri'i bene ana nú rri'i bene dula neca castiya pero nú lia rliqui' Diose neca elunehuañi nú leca xunga laxu equie cuenda' Jesucristo enu rnibiya' lua'ahua.

Ejemplu' bee bene enu nechia

7 Bee sa'a enu nzeli arquia'ahua Jesucristo li'ihua nediya'hua nú xneca neca ley, nú ley rnibiya' lubee bene diqui nú nehuañi bene. ²Necane xi neca tucu una'a enu nechia nú leca' modo chianchu stucu niyu rene diqui nú nehuañi niyu'nchu, pero tunu ati niyu'nchu leca ley nú cá nú chianchu stucu bese. ³Pero tunu nehuañisca' niyu'nchu nu yucunchu stucu niyu, nehuañinchu lu eluhexe che. Pero tunu unguti niyu'nchu leca' ley nucá nú chianchu stucu niyu, nu la ri'inchu eluhexe che.

⁴Le'ca scua bee sa'a enu nzeli arquia'ahua Jesucristo, equie nú unguti Jesucristo, ulaxu nú rnibiya' ley' Moisés luhua. Neequie necalahua bee bene' Jesucristo. Li'inu enu uhuañi zeca lu eluti, nu scua nu' modo nú ria'ahua tucu nú niarqui' Diose nú ria'ahua.

⁵Xne chenu uhuañia'ahua tucu nú niarqui'tsia'ahua a'la máse uri'i ley nú uya'la elliebacu'ahua para nú ria'ahua lunú la nibiya' ley nú ria'ahua nu scua uria'ahua nú

necha neca nú riala aze'ca'ahua castiya. ⁶Pero nee neca xi neca nú ungutilla'ahua lu cuenda' ley, nee nú la nibiya' ley lua'ahua nu lunú uche'ela modo nú nehuañia'ahua, nee nu' modo nú ria'ahua lunú niarqui' Diose nú ria'ahua equie cuenda' Espíritu Santo nú nzu cuna lia'ahua. Nu la necane equie nú nzenala'ahua nú rnibiya' ley.

⁷La nia luhua nú la neca nze'ca ley, xne lacane esquie. Xne tunu leca ley lá aria'a beya' nú xi neca dula, nu leca xunga aria'a beya' nú dula neca chenu rle'lu stene' sa'lu, tunu leca nú rni ley: "La le'lu stene' sa'lu." ⁸Pero chenu uri'á beya' nú la neca nze'ca nú rle' bene stene' sa'lla che máse udala dula nú rri'á equie cuenda' ye nú rlea lu'cua nú rlu'cu stucu bene. Tunu leca ley lá ari'i bee bene beya' xi neca dula. ⁹Ante nú chulua ley ulle'caa nú nehuañi nze'caa. Pero chenu uyulua ley uri'á beya' nú rri'á dula nu equie cuenda' dula cua' necaa xi neca tucu bene enu unguti. ¹⁰Sibi' ley para nú ri'i bee bene beya' xneca riala nú huañilla. Pero para li'á sibi'tsia ley para nú atia. ¹¹Xne hua'tu uzequienu dula li'á nú nu' modo ri'á ye nú rnibiya' ley pero le'ca lu cuenda' ley cua' uri'á beya' nú riala zecaa castiya.

¹²Pero la necane nú necha neca ley xne Diose udu' ley, nu ye nú rni ley le'ca Diose udu'e, nu neca nze'cae, nu neli rnii. ¹³La lu'cu ley culpa nú atia, sino que dula neca nú uzequienu li'á para nú atia nu equie cuenda' ley cua' uri'á beya' nú necha neca nú rri'i bene dula.

¹⁴Nediya'ahua nú equie cuenda' Espíritu Santo nze'ta ley nú rni

equie cuenda'nu. Pero lunú necaa bene, enze'e siempre rri'i dula ana lua. ¹⁵La ri'á beya' xi se'ca xne lunú niarquía ri'á la ri'á, sino que lunú laniarquía ri'á enze'e neca nú rri'á. ¹⁶Nu chenu rri'á lunú la niarquía ri'á, scua rri'á beya' nú neca nze'ca ley, xne lu cuenda' ley rri'á beya' xi rri'á. ¹⁷Nu la ri'i riña'a lunú la yala ri'á, sino que rri'ine equie cuenda' dula nú nu' arquía. ¹⁸Xne lunú necaa bene, nediya nú lacaa bene nze'ca, mase nú niarquía ri'á nú neca nze'ca, pero la ri'á ana nú ri'á scua. ¹⁹La ri'á ana ri'á nú neca nze'ca niarquía ri'á, sino que a'lla lunú necha neca nú la niarquía ri'á enze'e rri'á. ²⁰Neequie tunu rri'á lunú la niarquía ri'á, la neca nú rri'i riña'ne, sino que necane equie cuenda' dula nú nu' arquía enze'e rri'á scua.

²¹Pero nee rri'á beya' nú máse niarquía ri'á nú neca nze'ca, pero chu rri'i dula nú nu' arquía ana lua. ²²Chiqui' riu' arquía zucua nú rnibiya' Diose. ²³Pero nu' tucu nú rcaa nú ri'á scua, nu nucua' neca dula, xne nu'sca' dula arquía.

²⁴¡Cue'curua! ¿Ti tsila'a li'á lu castiya nú zecaa equie dula nú rri'á nú necaa bene? ²⁵¡Pero che'tsalá Diose nú equie cuenda' Jesucristo utsila'anu li'á lu castiyacua'! Xne mase rri'á elliebacu' nú ri'á puro nú rnibiya' Diose, pero lunú necaa bene, rri'i dula ana lua.

Elunehuañi nú rlu'cu bene cuna Espíritu Santo

8 Enze'e ye bee bene enu nzeli arqui' Jesucristo la zeca' bee bene ze'e castiya' Diose. Bee bene

enu la nehuañia' lunú necha neca sino que rla'nalla nú huañilla tucu nú niarquí' Espíritu Santo nú huañilla. ²Xne lunú rnibiya' Espíritu Santo nú nzu cuna lia'ahua lunú neca tucu necatse'la'ahua cuna Jesucristo la nibiya' dula lua'ahua, nu le'ca la yala'ahua castiya' Diose. ³Lunú neca'ahua bene lá aca ley ari'i elietsa lua'ahua, ley nú udete' Diose lu Moisés. Pero nee uri'i Diose lunú né aca ley cua' ari'i. Li'inu uxe'lanu Lli'ninu lu iliulabe quie' xi neca tucu bene para nú ungutinu equie stula'ahua, nu scua udixiunu equie cuenda' stula'ahua para nú leca' xunga nibiya' dula lua'ahua. ⁴Nee nehuañi'la'ahua lu Diose xi neca tucu bene enu sucu' ley, xne la nehuañia'ahua tucu nú niarquí'tsia'ahua sino que nehuañia'ahua tucu nú rnibiya' Espíritu Santo.

⁵Bee bene enu nehuañitsia lunú neca elliebacu', rri'itsialla elliebacu' nú ri'illa lunú niarquí'tsialla. Pero bee bene enu nehuañi tucu nú rnibiya' Espíritu Santo, máse nzucululla nú ri'illa lunú rnibiya' Espíritu Santo nú ri'illa. ⁶Nu lunú nzuculu bene nú rri'itsialla lunú necha neca, che nze'ta castiya nú zecalla, pero chenu nzucutsialu bene nú rri'illa tucunú rnibiya' Espíritu Santo che rlu'cu bene elunehuañi lu Diose nu la chenu arqui'lla. ⁷Bee bene enu nzuculutsia nú huañi tucu nú niarquí'tsia, li'ibeei necabeei enu la zucu' nú rni Diose equie nú la niarquí'beeí nibiya' Diose lubeei nu le'ca la acabeei ri'ibeei tucu nú niarquí'nu. ⁸Enze'e bee bene enu nehuañi tucu

nú niarquitsia, la yu' arquí' Diose xa rri'ibee nze'e.

⁹Pero li'ihua la nehuañihua lunú necatsia elliebacu'hua, sino que li'ihua nehuañihua tucu nú rnibiya' Espíritu Santo, tunu neli nú nehuañihua cuna Espíritu Santo' Diose, xne bene enu la nzu Espíritu Santo cuna li'i laca nze'e bene' Jesucristo. ¹⁰Pero tunu nehuañilahu cuna Jesucristo, lecaxi ri'i mase nú unitilu dula li'ihua. Nu nee nehuañilahu cuna Espíritu Santo nu nebacu'la Diose li'ihua nú la lu'cuhua dula. ¹¹Nu tunu nehuañilahu cuna Espíritu Santo' Diose, li'inu enu uri'i nú uhuañi zeca Jesucristo lu eluti, che mase nú atihua, pero le'ca ri'i Diose nú huañi zeca cuerpo'hua lu eluti para nú lu'cuhua elunehuañi equie cuenda' Espíritu Santo nú nehuañi cuna li'ihua.

¹²Enze'e bee sa'a enu nzeli arquia'ahua Jesucristo, la yala nú huañia'ahua tucu nú niarquitsia'ahua. ¹³Xne tunu li'ihua nehuañihua lunú niarquitsia'ahua, che rialahua castiya'hua, pero tunu equie cuenda' Espíritu Santo nú nzu cuna li'ihua utsana' arquí'hua stulahua che lu'cuhua elunehuañi nú la laxua' lu Diose.

¹⁴Xne yebee bene enu sela nú rnibiya' Espíritu Santo' Diose lu, li'ibeella neca beella lli'ñi Diose. ¹⁵Xne lá yucuhua Espíritu Santo para nú lliquihua, xi xiqui tucu bene patron'lla sino que equie cuenda' Espíritu Santo necalahua lli'ñi Diose nu equie cuenda' Espíritu cua' rnia'ahua lu Diose: "iPa'ahua!" ¹⁶Nu le'ca equie cuenda'

Espíritu Santo quie' nediya'ahua nú si'ahua nú neca'la'ahua lli'ñi Diose. ¹⁷Nu lunú neca'ahua lli'ñi Diose riala'ahua herencia nú liqui' Diose tucu nú riala Jesucristo, tunu neli nú riquia'ahua nú nehuana ze'ca'ahua tucu nú ulle'canu che nu' modo riña'ahua liñibe elu nzucunu.

Eluxene nú atia'ahua liñibe

¹⁸Nediya nze'caa nú liaxi nú nehuana se'ca'ahua nee, luquela nú seca eluxene nú atia'ahua liñibe.

¹⁹Nu hasta yebeenú ureche' Diose, chiqui' nzuquiene nú ala' uriñala bichia nú acachee nú tineca bee lli'ñi Diose. ²⁰Xne iliulabe uchiñi lubeenú necha neca, pero lecaxi culpa'e, sino que Diose uzela nú ungae scua. Nu nee nzuquietsia iliulabe, ²¹nú la'ane lu beenú necha neca nu'lue, nu naa zecae tucu nú ñia nae chenu apenatsia uquixiee, tucu nú le'ca la'a bee bene' Diose lubee nú necha neca nu' lu iliulabequie'. ²²Nu diquila nú nzuquie iliulabe nú riña bichia ze'e, lia'ahua nediya'ahua nú chiqui' nehuana seca iliulabe xi seca tucu una'a enu ala endu'. ²³Nu la necane nú iliulabetsia seca scua sino que le'ca nua'ahua enu nchiñi Espíritu Santo arquí' xi neca tucu seña lunú liqui' Diose lua'ahua. Nu chiqui' nehuana se'ca'ahua diquila nú nelluaquie'ahua nú riña bichia nú acachee nú neca'ahua lli'ñi Diose, bichia chenu che'enu cuerpo'ahua nu liqui'nu stucu nú necuqui. ²⁴Nediya'ahua nú scua acane nu nucua' nzuculua'ahua nú aca equie nú nzeli arquia'ahua nú utsila'ala'ahua, li'ihua nediya'ahua

nú tunu lunú nelluaquie'ahua
nú aca ungalane, leca xiquie nú
lluaquie'la'ahuane. ²⁵Pero tunu
nelluaquie'ahua nú aca lunú lasca'
aca, che layala nú llaca'ahua
lluaquie'ahua nú acane.

²⁶Nu le'ca Espíritu Santo ri'i
elietsa lua'ahua chenu la ria'ahua
beya' xneca ria'ahua, xne nu' chenu
laca'ahua nacua'ahua lu Diose tucu
nú rialane. Nu chenu la ria'ahua
beya' xneca nia'ahua lu Diose
lunú niarquia'ahua nia'ahua, pero
Espíritu Santo nediya' xa rria'ahua
elliebacu', che li'inu see arquí'nu
rnacu'nu lu Diose lu cuenda'ahua.
²⁷Nu Diose, li'inu enu nu'lu arquí'
bee bene, nediya'nu xi rnacu'
Espíritu Santo lunu lu cuenda'ahua.
Xne chenu rnacu' Espíritu Santo
equie cuenda' bee bene' Diose,
li'inu rnacu'nu lu cuenda' bee bene
tucu nú niarquí' Diose.

Añica nú ria'ahua ana

²⁸Lia'ahua nediya'ahua nú ye nú
se'ca'ahua lu iliulabequie, zibi'i
lua'ahua, lia'ahua enu se'ca'ahua
Diose lia'ahua enu uri'i caso
stichia'nu para nú ria'ahua tucu
nú niarquí'nu. ²⁹Nu hasta hua'tu
nediya'la' Diose ti bee enu chili arquí'
li'inu, nu ucañinu li'ibeella para nú
huañi beella, nu acabeella xi neca
lli'ñinu Jesucristo, para nú Jesucristo
aca enu nibiya' lu ye bee bene enu
neca lli'ñi Diose. ³⁰Xne ye bee bene
enu nediya' Diose nú chili arquí'
li'inu, ucañinu li'ibeella nu ubixianu
beella para nú aca beella bee
bene'nu, nu ulu'cu cuendanu beella
nú la lu'cubeella dula, nu uninu nú
dete'nu eluxene lubeella liñibe.

³¹Nee nú nediya'la'ahua yebee
nucua' lecaxi ri'i mase nú rri'i
cundra bee bene lia'ahua, Diose
ri'i elietsa lua'ahua. ³²Necaa
Diose lli'ñinu unguti equie cuenda'
stula'ahua. Nu tunu uliquí'nu
lli'ñinu unguti equie stula'ahua.
¿Xaquie nú la liquí'nu ye beenú
liquí'nu lua'ahua equie cuenda'
lli'ñinu? ³³¿Ti aca xanabitsi lu
cuenda'ahua nú neca'ahua bene
enu rlu'cu dula ante Diose? Xne
le'ca li'inu ubacu'nu lia'ahua nú la
lu'cua'ahua dula. ³⁴Lecati aca ni nú
rialala'ahua castiya, xne Jesucristo
neca enu unguti para nú udixiunu
equie cuenda' stula'ahua, nu la neca
nucua'tsia sino que le'ca uhuañi
zecanu lu eluti, nu nee nzucunu
cue'tse Diose chube rnacu'nu lu
Diose lu cuenda'ahua. ³⁵Nu tucu nú
seca Jesucristo lia'ahua lecati ri'i
ana huachuu lia'ahua lunu. Pero
ni' nú nehuana nzu arquia'ahua,
urre nú nehuana se'ca'ahua, urre
lunú xi rri'inuu bee bene lia'ahua,
urre nú rlia'na'ahua, urre nú leca
xucua'ahua, urre nú xiquia'ahua,
urre lu eluti, lecaxi nú huachuu
lia'ahua lunu. ³⁶Lu ichi' Stichia'
Diose rni:

Equie nú necaru bee lli'ñilu, ye
ye'e nzuquie eluti li'iru,
rri'inu bee bene li'iru xi rri'inu
beei bee sanchi enu nzula
nú ati.

³⁷Pero ni' tucu bee nucua' la ri'i
ana lua'ahua xne rri'i Jesucristo
elietsa lua'ahua, li'inu enu seca
lia'ahua. ³⁸Nediya nze'caa nu ni'
eluti, nu ni' elunehuañi, nu ni' bee
ángle, nu ni' bee benechiquí', nu
ni' beelá bee enu rlu'cu nú rnibiya',

nu ni' lunú reca, urre lunú aca,
³⁹urre lunú nze'ta enza liñibe, urre
 liñi yuu, ni' tucue nu ni' stucu lunú
 ureche' Diose, lecaxi nu lecati aca
 huachuu lia'ahua lu eluseca' Diose
 equie cuenda' Jesucristo.

9 Como bene' Jesucristo nú
 necaa, rnia nú neli neca luhua
 la nia eluquichia' luhua. Nu li'á
 nediya nú Espíritu Santo nediya'
 nú neli neca nú rniá luhua, ²nu
 yeye'e chiqui' nehuana nzu arquia
 hasta nú rcuu arquia. ³Nu hasta
 niarquia nú mase nú yalalá castiya'
 Diose mase nú huachu Jesucristo
 li'á tucu chu, pero ala' nú tunu
 scua nu' modo ri'i nucua' elietsa
 lubee bene lachia Israel para nú
 la zeca beei castiya. ⁴Nucua' si'á
 lubee bene lachia Israel, nu li'ibeei
 neca enu ucañi Diose nú aca bee
 bene'nu, nu rulu siqui'nu ube'tanu
 lubeella, nu uninu lubeella nú
 xneca modo lu'cubeella tucu inziu
 nú riña beella lunu, nu udete'nu
 leynu yabeella, nu uninu lubeella
 nú xneca lu'cubeella ula'na lunu, nu
 uninu nú xi dete'nu lubeella. ⁵Nu
 la necane lucuenda'tsia bee nucua',
 sino que le'ca lubee familia'ahua
 enu udetela enu uzibi' lu Diose
 nze'tabeella, nu le'ca lu familia cua'
 nze'ta Jesucristo chenu uriñanu
 lu iliulabe li'inu enu neca Diose
 enu riala nú lu'cu bee bene ula'na
 lu diqui tiambu, equie nú rlu'cunu
 elurnibiya' lu yabee nú nu'. Amén.

⁶La nia luhua nú la tsalua' Diose
 stichia'nu lubee bene Israel, sino
 que lunú rnia nú la yabee bene
 Israel neca bee bene' Diose. ⁷La
 necane equie nú nze'tabeella lubee
 familia' Abraham nú yebeella

neca beella bene' Abraham, xne
 uni Diose lu Abraham: “Hasta lu
 endu'lu Isaac quixie bee lli'ñilu.”
⁸Scua rria'ahua beya' nú la neca nú
 neca bene bene Israel, nú necala
 bene bene' Diose, sino que bee
 enu neca bene' Diose neca bee enu
 nebacu' nze'ta leta bee familia'
 Abraham xne nzeli arquibella
 Stichia' Diose xi uyalí arquí'
 Abraham. ⁹Xne uyalí arquí'lla nú
 uni Diose lulla, chenu uninu lulla:
 “Steliana le'ca mismo tiambuquie'
 nzela nu che rlu'cula Sara tucu
 endu'.”

¹⁰Nu lacane nucua'tsia sino que
 chenu uru'cu Isaac endu' Sara, che
 uchialla Rebeca. Nu ante nú ala
 bee cuachi enu ullana Rebeca.
¹¹Chenu lasca' chulu beenu ni'nú
 neca nze'ca nú ni' nú necha neca,
 para nú acachee nú nediya'la' Diose
 xa rcañinu bene, nu la necane
 lunú xa rri'i bene sino que li'inu
 nediya'la'nu ti rcañinu, nu ante nú
 ala bee cuachi cua', ¹²Diose uni lu
 Rebeca: “Lurucu bee cuachicua' enu
 ala nú rrucu, neca enu nibiya' lu
 enu rlutílá ala.” ¹³Tucu nú nequie lu
 ichi' Stichia' Diose elu rni: “Ulle'caa
 Jacob pero ulea lu Esaú.”

¹⁴Nu nee, ¿xie' nu' modo nú
 nia'ahua nú la ri'i Diose tucu nú
 necane ché la? ¡Pero lacane esquie!
¹⁵Xne uni Diose lu Moisés: “Se'caa
 bee bene enu niarquia nú ze'caa
 nu rua'a arquia bee bene enu
 niarquia nú hua'a arquia.” ¹⁶Enze'e
 leca modo nú hua'a arquí' Diose
 bee bene lunú niarquí'tsialla
 urre equie nú xi rri'lla sino que
 necatsia nucua' cuenda' Diose nú
 ti niarquí'nu hua'a arquí'nu. ¹⁷Lu

ichi' Stichia' Diose rni nú uni
Diose lu arre Egipto: "Li'á uri'á
nú ungalu arre para nú lañi' bee
bene lunú recaa nu lu cuenda' li'ilu
ri'chialeitse bee bedichia' nú ti
necaa diqui lu iliulabe." ¹⁸Enze'e
nia luhua nú nediya'lla' Diose nú ti
niarqui'nu hua'a arqui'nu, nu le'ca
rri'li nzitinu enu niarqui'nu nú aca
nziti.

¹⁹Pero tala bese nihua lua: "Tunu
scua necane, ¿xinu rle Diose nú
xneca neca'ahua nu leca modo
nia'ahua lu Diose nú xi ri'inu?"

²⁰Pero, ¿ti necalu para nú niilu scua
lu cuenda' Diose? Xie' nu' modo ni
etsu lu bene enu ureche' etsu: "¿Xinu
ureche'lu li'á scua?" ²¹¿Xie'lanu
enu rreche' bee etsu, li'illa rri'inulla
yuubi'chi xitse nú niarqui'lla la?
Li'illa nediya'lla xi reche'lla cuna
yuubi'chi ze'e, tunu reche'lla tucu
etsu nú rqui'ña yeye'e urre tucu etsu
nú rqui'ñiatsia lu eliñi.

²²Neequie le'ca scua nediya'lla'
Diose ti riala castiya, nu hasta nú
nu' beya' nú chu dete'nu castiya
bee bene para nú scua acachee nú
rlu'cunu poder pero li'inu ulu'cu
arqui'nu nu uriqui'nu bee bene enu
lá zucu' stichia'nu bee enu riala
nú nitilu. ²³Nu uriqui'nu li'ibeei
para nú acachee nú li'inu rlu'cu
cuendanu nú xa ri'inu nu rlu'cunu
nú rnibiya'nu, nu uhua'a arqui'nu
bee enu nediya'lla'nu nú hasta
hua'tu riala nú chu'u liñibe. ²⁴Nu
lia'ahua neca bee benecua', bee
enu ubixia Diose sia leta bee bene
Israel nu sia leta bee bene enu laca
bee bene Israel. ²⁵Tucu nú nequie
lu ichi' Stichia' Diose nú uquie'e
profeta Oseas, elu rni:

Bee enu laca benea, nia lubeei
benea,
nu bee bene enu lecati zeca, li'á
zecaa beei.

²⁶Elu uni Diose lubee bene:
"Li'ihua lacahua bee benea",
ze'e li'ibeei acabeei lli'ñi
Diose enu nehuañi.

²⁷Le'ca uni profeta Isaías equie
cuenda' bee bene Israel: "Mase nú
chiqui' huaxi bee bene Israel tucu
nú huaxi eyuxi ru'u inzatu', pero
laca huaxi bee bene enu tsila'a.

²⁸Xne lacaxea nú tsalu Diose
stichia'nu lu iliulabequie' tucu nú
unilanu." ²⁹Nu hasta hua'tu le'ca
uni profeta Isaías:

Tunu Pa'ahua Diose enu rlu'cu
ye nú rnibiya' azela nú
alaxu yebbe bene'ahua enu
udetela,

hasta hua'tula ulaxu bee
bene'ahua che, tucu nú
ulaxu bee bene Sodoma
cuna Gomorra.

Bee bene Israel cuna Stichia' Diose

³⁰Neequie, ¿xania'ahua nee? Bee
bene enu laca bee bene Israel ni' lá
achenu arqui'beella xa tsila'a beella
pero nee utsila'ala beella lunú nzeli
arqui'beella Jesucristo. ³¹Nu bee
bene Israel mase nú chiqui' ula'na
beella modo nú xneca huañibeella
tucu nú rnibiya' ley para nú
tsila'a beella pero né ri'ibeella
ana. ³²¿Xiquie nú né ri'ibeella
ana nú tsila'a beella? Xne mase
ula'na beella nú huañi beella tucu
nú rnibiya' ley, luhuare nú chili
arqui'beella Diose tucu nú riala
nú chili arqui'beella li'inu para nú
tsila'a beella. Nu unga Jesucristo

lubeella: “Xi neca tucu quiee nú xica cuchiu' bene.” ³³Tucu nú nequie lu ichi' Stichia' Diose elu rni:

Li'á zucua tucu quiee eyeche
Sión, quiee nú llica cuchiu'
bene, nu zana' bene.

Nu enu chili arqui' li'inu leca'
xunga tu' nze'e.

10 Bee sa'a enu nzeli
arquia'ahua Jesucristo,
chiqui' rnacua lu Diose nú tsila'a
bee bene Israel. ²Xne li'á nediya
nú chiqui' rla'na beella nú zibi'
beella lu Diose. Pero la ri'ibeella
beya' xneca ri'ibeella. ³Xne la zela
beella chili arqui'beella tucu nú
rialane para nú ri'i Diose perdona
beella sino que nzenalatsia beella
tucu nú nzeli arqui'beella nú aca
perdona beella, luhuare nú ri'i
beella tucu nú niarqui' Diose para
nú ri'i Diose perdona beella. ⁴Xne
equie cuenda' Jesucristo ulaxu nú
rnibiya' ley' Moisés lubee bene, nu
nee bee bene enu chili arqui' Diose
uri'ilanu perdona li'ibeella.

⁵Pero bee bene enu niarqui' nú
huañi sin dula lu iliulabequie' equie
nú nzenala beella ley' Moisés unii
nú bene enu rri'i ye nú rnibiya' ley'
lu'culla elunehuañi mientras nú
sucu'lla ley. ⁶Pero lunú uri'i Diose
perdona bene necane lunú uchili
arqui'lla Jesucristo nu la yala' ri'illa
elliebacu': “¿Ti aca quiee liñibe?”
Xne chenu rri'i bene elliebacu' scua
niarqui' bene nú lañi'lla nú laca
Jesucristo lu iliulabe. ⁷“Le'ca la
yala nilla: ¿Ti aca cha elu nu' bee
benenguti?” Xne chenu rnilla scua
niarqui'lla nú lañi'lla nú huañi zeca
Jesucristo leta bee benenguti. ⁸Pero
lu ichi' Stichia' Diose rni: “Axu

nzu Stichia' Diose lulu, rri'itsia nú
niilu nu ri'ilu elliebacu' tunu chili
arqui'lue.” Xne lunú rixiule'eru
lubee bene necane nú xneca chili
arqui' beella, nu singuie necane.
⁹Tunu li'ilu nilu nú Jesucristo
neca enu rnibiya' lulu nu diquinu'
arqui'lu chili arqui'lu nú Diose uri'i
nú uhuañinu lu eluti, che tsila'alu.
¹⁰Xne desde hora nú diqui'nu arqui'
bene nzeli arqui' bene Jesucristo
che utsila'alla. Nu chenu ni bene nú
Jesucristo neca enu rnibiya' lulla
che tsila'alla. ¹¹Lu ichi' Stichia'
Diose rni: “Ye bee bene enu chili
arqui' Jesucristo leca xunga ya'na
netúlla.” ¹²Nu nucua' rni nú ante
Diose iguale neca ye bee bene leca
xiri'i nú ti benella, tunu necalla
bene Israel urre lacalla bene Israel.
Xne tucutsia Diose neca Diose lu ye
bee bene, nu chiqui' ñia rri'inu luye
bee bene enu rnacu' lunu. ¹³Tucu
nú nequie lu ichi' Stichia' Diose
elu rni: “Yebee bene enu rnacu' lu
Diose tsila'a bee nze'e.” ¹⁴Pero, ¿xa
nacu' bene lunu tunu lasca' chili
arqui'beella li'inu? ¿Nu xa chili
arqui' beella li'inu tunu lasca' yene'
beella nú ti necanu? ¿Nu xneca
yene' beella nú ti necanu nu lecati
ixiule'e xa neca stichia'nu? ¹⁵Nu,
¿xneca ixiule'e beella stichia'nu
tunu lecati xe'la li'ibeella? Lu ichi'
Stichia' Diose rni: “iChiqui' ñia
neca chenu rriña bene enu rriñayu
resuna nze'ca para nú huañi nze'ca
bee bene!”

¹⁶Pero la yebee bene rri'i caso bee
bedichia' nze'ca' Diose, tucu nú uni
profeta Isaías: “Diose Pa liñibe, ¿ti
uchili arqui' stichia'lu nú rniru?”

¹⁷Enze'e lunú riene' bene nzeli

arqui' bene, nu lunú riene' bene
neca bedichia' nze'ca' Jesucristo.

¹⁸Nu, ¿xie' lasca' yene' bee bene
Israel Stichia' Diose la? ¡Pero li'á
nia luhua nú ubene'la' beellae! Xne
lu ichi' Stichia' Diose rni:

Diqui lu iliulabe uri'chia letsela
Stichia' Diose,
nu hasta elu máse istu lu
iliulabe ubene'la' bee bene
stichia'nu.

¹⁹Neequie rri'á elliebacu': ¿Xie' nú
la ri'i bee bene Israel beya' Stichia'
Diose la? Pero li'á nia nú rri'i beella
beya'e. Xne hasta hua'tu uquie'e
Moisés nú uni Diose equie cuenda'
beella chenu uninu:

Li'á ri'á nú yiea archi'hua lunú
ri'á lubee bene enu laca bee
bene Israel,
nu lunú ri'á cuna li'ibeei mase
nú lacabeei xi recahua, che
leehua.

²⁰Nu le'ca sin nú lliqui profeta
Isaías uquie'ella lunú uni
Diose equie cuenda' bee bene
Israel chenu uninu:
Bee bene enu laca bee bene
Israel mase nú né la'nabeei
li'á pero ullela'bee li'á.

Nu ulubelua lubeei mase nú ni'
né nedichia' bee li'á.

²¹Le'ca uquie'e profeta Isaías lunú
uni Diose equie cuenda' bee bene
Israel chenu uninu: “Debichia
nzuquiea nú ye'tabeei lua, pero lá
niarquibeei azucu'bee nú rníaá nu
rnibeei bee bedichia' nú necha neca
equie cuenda.”

Bee bene Israel enu netsila'ala

11

La nia luhua nú utsana'
archi'la Diose bee bene

Israel, xne lacane scua. Li'ihua
nediya'hua nú le'ca bene Israel
necaa, nu le'ca leta bee familia'
Abraham nzela equie nú nzela
lubee familia' Benjamin. ²Asta
hua'tu ucañi Diose bee bene Israel
nú aca beella bee bene'nu, enze'e
la tsana' archi'nu beella. A nchiucu'
archi'hua lu ichi' Stichia' Diose
elu rni: Chenu uxañabitsi profeta
Elías lu Diose equie cuenda' bee
bene Israel chenu unilla: ³“Diose
Pa liñibe, udiñila beella ye bee
profeta'lu, nu unitilula beella bee
ecu'cu'lu. Nu stucutsia li'á uya'naa
nu le'ca niarquibeei beella nú úti beella
li'á.” ⁴Pero ¿xi ucuquie Diose lulla
che? Li'inu ucuquie: “Uhuachulá
achi mili bee bene para li'á enu
lasca'li zuculliqui lu diose enu lee
Baal.” ⁵Le'ca scua nucua'a chiucu
chuna bee bene Israel enu rua'a
archi' Diose, nu ucañinu beella
para nú aca beella bee bene'nu.

⁶Nu equie nú uhua'a archi' Diose
beella, enze'e ucañinu beella, nu la
necane equie nú xi rri'ibeella, xne
tunu ucañi Diose beella equie nú xi
rri'ibeella che la aca'e equie cuenda'
nú ru'a archi' Diose beella.

⁷Scua ungae. Bee bene Israel enu
ucañi Diose, ullela'la'beella inziu'
Diose equie nú nzeli archi'beella
li'inu. Pero beelá bee bene Israel
lasca' llela' beella inziu' Diose,
xne rla'na beella inziu' Diose
tucu nú niarquibeei beella, nu la
cua'na beella Stichia' Diose tucu
nú niarquibeei, che uri'inu nú unga
nziti archi'beella. ⁸Tucu nú nequie
lu ichi' Stichia' Diose elu rni: “Uri'i
Diose nú unga necabe elliebacu'
beella, mase rlañi' beella pero neca

xi neca nú la lañi'beella, nu mase riene' beella pero neca xi neca nú la yene' beella”, nu scua rri'ibeella hasta nee. ⁹Le'ca uni David:

Equie elubacu nze'ca' beei
nu eluxene'beei nucua'
sequienu arqu'beei nú
nehuañi nze'ca beei,
nu zequienu arqu'beei
para nú zeca beei castiya nú
rialabeei,

¹⁰ Nu cabe i'cu'lubeei xi necabe
i'cu'lu tucu bene enu la ye'e
lu,
nu zecabeei xi seca tucu bene
enu leca xunga tsuxe nú
nehuana seca.

**Tsila'a bee bene enu laca
bee bene Israel**

¹¹ La nia luhua nú lunú lá zela bee bene Israel ari'i tucu nú niarqu' Diosé nú unitilulabeella lu Diosé, xne lacane scua. Lunú rnía luhua necane nú lá zucu' beella Stichia' Diosé, che scua ulu'cu bee bene enu laca bee bene Israel nú xneca tsila'abeella, para nú scua yea arqu' bee bene Israel nu che nu' modo tsila'abeella. ¹² Nee tunu lunú la zucu' bee bene Israel Stichia' Diosé, uzibi' nucua' para nú yala beelá bee bene iliulabe eluxene' Diosé, nu lunú uluachu beella lunú niarqu' Diosé ri'ilubeella uzibi' nucua' para nú tsila'a bee bene enu laca bee bene Israel. ¡Chiqui' masescalá ñia ri'i Diosé nú cha nze'ca lu cuenda' bee bene chenu zela bee bene Israel ri'i tucu nú niarqu' Diosé nú ri'ibeella!

¹³ Nía luhua bee bene enu laca bee bene Israel, scua tucu nú uxe'la

Diose li'á luhua para nú ixiule'a stichia'nu luhua, chiqui' rla'naa nú ri'á tucu nú ríala nú ri'á, ¹⁴ para nú scua biase chu'u bee bene lachia Israel enu chiqui' niarqu' ri'i tucu nú rri'ihua, nu che tsila'abeella.

¹⁵ Neli nú equie nu né zucu' bee bene Israel Stichia' Diosé, scua uyu'u modo nú xneca atsila'a beelá bee bene. Pero, ¿chiqui' masescalá ñia neca chenu chili arqu' bee bene Israel Stichia' Diosé? neca nucua' xi neca chenu rehuañi zeca tucu bene enu unguti. ¹⁶ Nu scua tucu nú uri'i Diosé nú nza nze'cae lu cuenda' bee bene Israel enu udetela, nucua' neca tucu seña nú le'ca scua cha nze'cae lu cuenda' beelá bee bene Israel, le'ca scua tunu rri'i Diosé nú nza nze'ca lu cuenda' luu tucu aca, nu chenu nza nze'cala luu aca cua', diquineca aca cua' nza nze'ca lu cuenda' che.

¹⁷ Bee bene Israel neca beella xi neca tucu aca olivo, pero nu' beella enu neca xi neca ellutsa lue nú urecu', nu li'ilu enu laca bene Israel necalu xi neca tucu ellutsa' aca olivo ixi nú uyela' luhua'e' ellutsaa nú urecu' lu aca olivo ze'e, chequie scua rlu'culu elunehuañi equie cuenda' luu aca ze'e. ¹⁸ Enze'e la tsi'lu nú maselálu lu ellutsa' aca olivo nú neca xi neca bee bene Israel. Pero tunu scua rri'ilu elliebacu', ullu'cu' arqu' nú laca li'ilu enu rdete' elunehuañi' luu aca ze'e sino que luu aca ze'e rliqui' elunehuañi'lu.

¹⁹ Tal vez nilu: “Neli'lu nucua', pero bee ellutsaa lu aca olivo cua' urecu'e para nú yela'a luhua'e' nu acatucunecatsea cuna aca

olivo cua'." ²⁰Neli'lu nucua', pero bee ellutsa' aca olivo nú rniru nú neca bee bene Israel urecu' bee xne la chili arqui' nu li'ilu uyu'ulu luhua'e equie nú nzeli arqui'lu Jesucristo, enze'e la aca nelliñalu sino mejora nú bi'ya li'ilu. ²¹Xne tunu bee bene Israel enu neca xineca ellutsa lu aca olivo ze'e né hua'a arqui' Diose le'ca scua nu' beya' nú la hua'a arqui' Diose li'ilu. ²²Uri'i beya' nú nze'ca Diose, pero le'ca rri'inu elu usticia tucu nú necane. Nu uri'ilanu elu usticia lubee bene enu la zucu' stichia'nu, nu uri'inu nú neca nze'ca lulu. Pero riala nú huañilu tucu nú niarqui' Diose nú huañia'ahua xne canu le'ca ri'i Diose elu usticia'nu lulu. ²³Nu tunu bee bene Israel benchila' arqui'beella lu Diose nu chili arqui'beella Jesucristo che li'inu lu'cu cuendanu li'ibeella cuna beelá bee bene enu nzeli arqui' Jesucristo. Xne li'inu rlu'cunu poder para nú ri'inu nú acatucunecatse beella cuna beelá bee bene Israel. ²⁴Xne tunu li'ilu enu laca bene Israel necalu xi neca tucu ellutsaa aca olivo ixi nu unga tucunecatse lu cuna aca olivo stila nú neca bee bene Israel, ixaquie nú la acane scua lubee bene Israel enu lá zucu' Stichia' Diose nú la aca tucunecatse beella stucu bese cuna beelá bee bene Israel, tunu zucu' beella Stichia' Diose!

Bee bene Israel tsila'a

²⁵Bee sa'a enu nzeli arquia'ahua Jesucristo nu' tucu nú la ri'ihua beya nu niarquía nú ri'ihua beya'e para nú la aca nelliñahua: bee

bene Israel enu reca nziti la niarqui' zucu' Stichia' Diose, scua recae hasta bichia nú laxu chili arqui' yebee bene enu laca bee bene Israel Stichia' Diose, bee enu rqui'ña nú chili arqui'. ²⁶Chenu ungalane scua che ye bee bene Israel ri'i caso Stichia' Diose. Nu scua tsila'a beella tucu nú nequie lu ichi' Stichia' Diose elu rni:

Eyeche Sión chiu'u tucu bene enu ri'i elietsa lubee bene enu nze'ta lu familia' tuxie Jacob,

para nú tsana' arqui'beella nú necha neca rri'ibeella.

²⁷Che yalu stichia'a tucu nú unila nú ria'á perdona stula beella.

²⁸Pero nee lunú reca nziti bee bene Israel nu lá chili arqui'beella bedichia' nze'ca' Jesucristo, che scua nu' modo chili arqui'hua li'ihua enu laca bee bene Israel. Nu añinzuca nú scua necane pero secasca' Diose li'ibeella tucu nú ucuahui u'nanu lubee bene'beella enu udetela. ²⁹Xne la che'e Diose elliebacu'nu, nu la yucunu lunú lia udete'nu lubee bene, nu le'ca la tsana' arqui'nu bee bene enu ucañilanu para li'inu. ³⁰Hua'tu li'ihua ne chenalagua Stichia' Diose. Pero nee equie cuenda' bee bene Israel enu la zucu' Stichia' Diose nee ulube'nu luhua nú rua'a arqui'nu li'ihua. ³¹Nu tunu nee bee bene Israel la zucu' Stichia' Diose, recae scua para nú hua'a arqui' Diose li'ihua, pero le'ca riña bichia nú hua'a arqui'nu li'ibeella. ³²Uzela Diose nú sia bee bene Israel nu bee bene enu laca bene Israel la zucu'

beella stichia'nu para nú hua'a arqui'nu beella.

³³¡Chiqui' llene neca eluxene' Diose cuna lunú recanu nu cuna lunú rri'inu beya'! Lecati ri'ibeya' xa neca elliebacu' Diose urre lunú rri'inu, ³⁴tucu nú nequie lu ichi' Stichia' Diose elu rni: “¿Ti itá ri'i beya' nú xneca neca elliebacu' Pa'ahua Diose? ¿Ti máse reca para nú nii lu Diose nú xneca ri'inu?” ³⁵Urre, “¿ti udete' xi udete' lu Diose para nú nzuquie nze'e nú ixiunu lu nze'e?” ³⁶Yabee nú nu' neca stene'nu nu li'inu ureche'nue nu yeene necane para li'inu. Enze'e riala nú lu'cu bee bene ula'na lunu diqui tiambu. Amén.

Xa niarquí' Diose nú huañi bee bene

12 Enze'e, bee sa'a enu nzeli arquia'ahua Jesucristo, sequia nu nacua luhua, nú scua tucu nú uhua'a arqui' Diose lia'ahua, ude'tecuendahua li'ihua lu Diose xi neca tucu u'na nú nehuañi nú lecaxina nu riu' arqui' Diose. Para nú huañihua tucu nú niarquí'nu nú huañihua nu scua riala lu'cuhua ula'na lunu. ²La huañihua xi nehuañi beelá bee bene enu nucua'a tiambu quie', mejora uche'ehua elliebacu'hua para nú scua che'e nú xneca nehuañihua nu scua ri'ihua beya' nú xneca niarquí' Diose nú huañihua. Nu le'ca scua ri'ihua beya' ta nú neca nze'ca nu ta nú riu' arqui' Diose, nu ta nú riala ri'ihua.

³Equie nú seca Diose li'á enze'e ucañinu li'á, nu uxe'lanu li'á para nú ixiule'a stichia'nu luhua. Enze'e nialuhua, ni'tucuhua la

aca nelliñiahua nú másela neca equiehua lubeelá bee bene. Mejora uri'ihua elliebacu' nze'ca equie cuenda'tsiahua tucu nú necane nu tucu nú uliqui' Diose elliebacu' lu cada tucuhua. ⁴Xne scua tucu nú neca cuerpo' bene nú huaxi parte necane pero laca yeene sibi'i ihuale. ⁵Le'ca scua lia'ahua enu nzeli arquia'ahua Jesucristo mase nú huaxia'ahua pero lunú nzeli arquia'ahua Jesucristo scua neca tucunecatse'ahua cuna li'inu, xne cada tucua'ahua ria'ahua lunú riala ria'ahua para nú ria'ahua elietsa lubee sa'ahua. ⁶Nu cada tucua'ahua urene elliebacu' uliqui' Diose lua'ahua tucu nú uninu nú reca'ahua. Enze'e tunu uliqui'la Diose nú nia'ahua stichia'nu, rqui'ña nú nia'ahua stichia'nu lubee bene, equie nú nzeli arquia'ahua li'inu. ⁷Tunu uliqui' Diose elliebacu' nú zibi'ahua lubee sa'ahua uri'ihua tucu nú necane. nu enu udete' Diose elliebacu' para nú zete' stichia'nu lubee bene rqui'ña nú zete'lla stichia'nu lubee bene. ⁸Nu tunu necane nú udete'nu elliebacu' lulla nú nilla lubee bene rqui'ña nú scua ri'illa. Nu tunu udete'nu elliebacu' nú xi lia dete'lla lubee bene la tsuquiella nú xi ati'lla, nu enu dete'nu elliebacu' nú nibiya' rqui'ña nú bi'yalla xa nibiya'lla tucu nú rialane, nu enu udete'nu nú ri'i elietsa lubee bene enu seca elitsi rqui'ña nú ñia nzu arqui'lla ri'llae.

Xa riala huañi bee bene enu nzeli arqui' Jesucristo

⁹Uzecahua bee sa'hua nu la ri'ihua nú lia ri'itsiahuane nu

uluachuhua nú necha rri'ihua, nu uri'ihua nú neca nze'ca. ¹⁰Diquinu' arqui'hua uzecahua bee sa'hua xi neca tucu bichihua nu la zucu' ayahua li'ihua, nu ulu'cuhua ula'na lusa'hua.

¹¹La nebichiuhua lunú rri'ihua uri'ihua lunú riala ri'ihua, diquinu' arqui'hua xne lu Jesucristo neca enu sibi'hua. ¹²Ñia utsu arqui'hua uhuañihua lunú nzuquie arqui'hua, nu uriqui'hua lunú nehuana secahua nu la lliquihua, nu la tsana' arqui'hua nú rnacu'hua lu Diose. ¹³Uri'ihua elietsa lubees sa'ahua enu nzeli arqui' Jesucristo chenu nu' xi secala'cha'beella nu xi rqui'ña beella, uri'ihua elietsa lubeella. Nu chenu nu' ti rri'ña ni'hua uri'i nze'cahua lubeella.

¹⁴Una'cu'hua lu Diose equie cuenda' bee bene enu necha rri'inu li'ihua nu le'ca una'cuhua nú cha nze'cae lu cuenda' beella nu la i'ñahua nú xi zeca beella.

¹⁵Ñia utsu arqui'hua cuna bee bene enu ñia nzu arqui', nu bee bene enu nehuana nzu arqui' ulube'hua lubeella nú le'ca nehuana nzu arqui'hua cuna li'ibeella.

¹⁶Uhuañi nze'cahua cuna beelá bee bene, nu la aca nelliñiahua sino que uquie'te'hua ye bee bene, nu la tsi'hua nú recasca'lahua lubeelá bee sa'hua.

¹⁷La duse'ehua nú necha necha lubees bene enu rri'i nú necha necha luhua, nu ubi'yahua nú ri'ihua nú neca nze'ca lu ye bee bene.

¹⁸Ula'nahua nú chiqui'sca'lá huañi nze'cahua nu la liunuhua bee bene.

¹⁹Bee sa'a enu nzeli arquia'ahua Jesucristo la duse'ehua nú necha

rri'inu bee bene li'ihua mejora uzelahua nú Diose dete' castiya lubeella, tucu nú rni lu ichi' Stichia' Diose elu rni: "Li'á riala ri'á elu usticia nu detea castiya lulla. Scua uni Diose Pa liñibe." ²⁰Le'ca uninu: "Tunu bene enu rle lulu rlia'na' ude'te' nú aculla, nu tunu rrebichi'lla ude'te' nú hue'lla, xne scua lañi'lu nú chiqui' tu'lla." ²¹La zelalu nú ri'i nú necha necha ana lulu mejora uri'i nú neca nze'ca para nú ri'ilu ana lunú necha necha.

13 Yeebe bene rqui'ña nú zucu' nú rnibee usticia cuna ubierno. Xne Diose udu' bee usticia cuna ubierno, nu li'inu rdete'nu elurnibiya' nú rlu'cubeella. ²Enze'e bee bene enu la zucu' nú rni bee usticia le'ca la zucu'bee nú rni Stichia' Diose nu bee bene enu rri'i scua le'ca li'ibeei rla'na beei nú zeca beei castiya. ³Xne bee usticia la nucua'a beella para nú dete' beella castiya lubees bene enu lecaxi ri'i, xne nucua'a beella para nú dete' beella castiya lubees bene enu necha rri'i, nu tunu la niarqui'lu nú ri'chia usticia li'ilu rqui'ña nú ri'i nze'calu, nu scua la ri'chia usticia li'ilu. ⁴Xne scua sibi' beella lu Diose para nú acanu'beella li'ilu. Pero tunu rri'ilu nú necha necha, che xiquilu bee usticia xne la necha nú lia rlu'cu beella elurnibiya' sino que scua sibi' beella lu Diose para nú dete' beella castiya bee bene enu necha rri'i. ⁵Enze'e rqui'ña nú zucu' bee bene nú rni bee usticia nu la acatsiae equie nú xiquibeella nú zeca beella castiya, sino que nediya' beella nú scua riala ri'ibeella. ⁶Nu le'ca u dixiuhua impuesto para nú

nzenibiya'la bee usticia, xne Diose udu' li'ibeella para nú nibiya' beella nu scua sibi' beella lu Diose.

⁷Enze'e ude'te'hua nú riala dete'hua, tunu riala nú dete'hua melu, ude'te'hua melu, nu tunu riala ixiuhua impuesto, udixiuhua impuesto. Nu uzu'cu'hua nú rni bee bene enu riala zucu'hua nú rni, nu ulu'cuhua ula'na lubee enu riala nú lu'cuhua ula'na lu.

⁸La aca nezi'quihua lubee bene, nu lunú la yala tsana' arquí'hua neca nú zecahua bee sa'hua. Xne bee bene enu secasa', scua sucu' bee nze'e ye nú rnibiya' ley' Diose. ⁹Xne bene enu sucu' mandamiento' Diose nú rni: "Uzeca sa'lu tucu nú secalu li'ilu." Enu sucu' mandamiento quie', sucu'la beelá bee mandamiento nú rni: "La ri'ilu eluhuexe, la utilu bene, la ri'ilu eluhua'na, la le'lu stene' sa'lu." ¹⁰Xne bene enu seca sa' la ri'illa nú necha neca lubeelá bee bene, enze'e bene enu seca sa' sucu'lalla ye nú rnibiya' ley' Diose.

¹¹Nu le'ca uri'ihua beya' xi tiempo nellua'ahua, nu uri'ihua beya' nú necala hora nú dete'ahua ellie'e. Xne nze'ta riñala bichia nú riña zeca Jesucristo stucu bese nu la lea' nú riña zecanu xi neca bichia chenu uchili arquia'ahua li'inu.

¹²Nze laxu tiempo, nu nze'ta riñala bee bichia nú riña zecanu, enze'e rqui'ña nú tsana' arquia'ahua inziu nú necha neca nzenala'ahua nu ria'ahua puro nú neca nze'ca para nú chenala'ahua inziu nze'ca.

¹³Rqui'ña nú huañi nze'ca'ahua, nu la ria'ahua beenú netú neca. Nu la yala nú aca'ahua uniqui nu la ria'ahua eliñi para nú chu'u modo

nú ria'ahua lunú la yala ria'ahua. Nu la yala nú ria'ahua eluhuexe urre xitse stucu bee vicio, nu la yala nú liu'ahua, nu la yala nú yea arquia'ahua lu sa'ahua. ¹⁴Sino que mejora uhuañihua tucu nú niarqui' Jesucristo nú huañihua, nu la yala nú huañihua lunú necha neca riu' arquí'hua.

La ze'ta bene sa'bene enu apenatsia nzeli arquí' Jesucristo

14 Uri'i nze'cahua lu tucu bene enu apenatsia uchili arquí' Jesucristo nu la liu ru'uhua cuna li'illa, tunu la ri'illa elliebacu' tucu nú rri'ihua elliebacu'. ²Xne nu' bee bene enu nzeli arquí' Jesucristo seca nú nu' beya' acu bene xitse pero nu'bee enu apenatsia nzeli arquí' Jesucristo, seca nú ñialá nú acu bene purotsia bee verdura para nú la aculla beenú la yala aculla. ³Pero bene enu seca nú nu' beya' acu bene xitse, la yala nú huachulla bene enu seca nú la yala acu bene xitse. Nu bene enu seca nú nu' beenú la yala acu bene, la yala nú ze'ta bene bene enu racu ye nú racu, xne tucutse bene' Diose neca beella. ⁴Enze'e, ¿ti neca bene nú ze'ta bene sa'bene enu nzeli arquí' Jesucristo equie cuenda' bee nucua'? Xne Diose nediya' tunu rri'i nzeca bene nu tunu la ri'i nze'ca bene. Nu tunu lasca' ri'i bene beya' nú xneca ri'illa, che Jesucristo rlu'cu poder para nú ri'inu elietsa lulla para nú ri'illa lunú riala ri'illa.

⁵Le'ca scua nu' bee sa'ahua enu nzeli arquí' Jesucristo seca nú nu' bee bichia cachi nú la yala ri'i bene riña' nu nu' bee enu seca nú ye bee

bichia ihuale neca. Pero lecaxi ri'i nucua' xne cada nú nzeli arquí' cada tucu bene. ⁶Xne bene enu seca nú nu bichia cachi nú la yala ri'i bene riña' rri'illa scua para nú lu'culla ula'na lu Diose. Nu bene enu seca nú ye bee bichia iguale neca, le'ca rlu'culla ula'na lu Diose. Nu bene enu racu ye nú racu, raculae xne nediya'lla nú Diose uliqui'i, nu rdete'lla che'tsa lunu equie cuenda'e. Nu bene enu seca nú nu' elubacu nú la yala acu bee bene, rri'illa scua xne secalla nú scua rlu'culla ula'na lu Diose nu le'ca rdete'lla che'tsa lu Diose.

⁷Ni' tucua'ahua la nehuañia'ahua lunú niarquí'tsia'ahua, nu le'ca la atia'ahua equie nú niarquí'tsia'ahua. ⁸Tunu nehuañia'ahua, equie cuenda' Jesucristo nehuañia'ahua nu para li'inu nehuañia'ahua, nu tunu atia'ahua, equie cuenda' Jesucristo atia'ahua nu para li'inu atia'ahua, enze'e tunu nehuañia'ahua urre atia'ahua necala'ahua para Jesucristo. ⁹Xne para enze'e unguti Jesucristo nu uhuañi zecanu, para nú nibiya'nu sia lubee bene enu nehuañi nu sia lubee bene enu unguti. ¹⁰Enze'e, ¿xiquie nú se'talu nu rluachulu bee sa'lu enu nzeli arquí' Jesucristo? Nu ye'ahua riña'ahua ante Diose para nú lualunue lu cuenda'ahua. ¹¹Xne lu ichi' Stichia' Diose rni:

Nu li'á enu neca Diose enu nehuañi nia luhua nú ye bee bene zucu lliqui lua.

Nu ye bee bene ni nú li'á necaa Diose, scua uni Diose.

¹²Nu cada tucua'ahua dete'ahua cuenda lu Diose lunú xi uri'i cada tucua'ahua.

La zelahua nú zana' sa'hua enu nzeli arquí' Jesucristo lu dula

¹³Enze'e, la yala ze'ta'ahua bee sa'ahua enu nzeli arquí' Jesucristo mejora te bi'ya'ahua lia'ahua nú la yala nú ria'ahua nú ri'i stucu bene dula. ¹⁴Nu lunú necaa bene' Jesucristo, nediya nze'caa nú lacane dula nú racu bene xitse pero para bene enu seca nú leca modo nú acu bene xitse, para li'illa necane dula tunu raculla xitse. ¹⁵Neequie tunu equie cuenda' beenú raculu seca sa'lu enu nzeli arquí' Jesucristo nú dula neca nú rri'ilu, nu tunu la ri'icasululla che neca nú la zecalu li'illa ubi'ya para nú la ri'i nú raculu nú ri'i sa'lu dula, xne le'canuu equie cuenda'lla unguti Jesucristo lu cruse. ¹⁶Enze'e la ri'ilu xi ri'ilu para nú la ze'ta bee sa'lu li'ilu añinzuca nú li'ilu nediya'lu nú neca nze'ca nú rri'ilu. ¹⁷Xne lu Diose la neca equie cuenda' nú racu bene urre equie cuenda' nú rue'e bene nú másela seca, sino que lunú máse seca ante Diose necane nú huañi bene tucu nú riala nú huañi bene nú huañilla sin xuu nu ñia nzu arquí'lla equie cuenda' Espíritu Santo. ¹⁸Nu bene enu nehuañi scua equie nú nzenalalla Jesucristo, sucu'lla tucu nú niarquí' Diose, nu tucu nú riu' arquí' bee bene.

¹⁹Enze'e rqui'ña nú la'na'ahua nú huañi nze'ca'ahua cuna bee sa'ahua sin xuu para nú nzeri'ila'ahua beya' xneca riala chenala'ahua inziu' Diose. ²⁰Bi'yahua xne canú equietsia beenú racuhua ri'ihua nú ri'i bee sa'hua dula, neli nú nu' beya' acu bene ye nú nu' pero

lunú necha necha tunu para sa'lu enu nzeli arquí' Jesucristo necha dula lunú raculu rnitilulu li'illa che. ²¹Enze'e tunu nu'bee sa'lu enu nzeli arquí' Jesucristo seca nú necha necha tunu acu bene mii nu le'ca necha necha nú hue' bene viñiu urre stucu nú rene, mejora la acu bene nu la hue' bene ante lulla para nú la ri'ilu nú ri'illa dula. ²²Añinzuca nú li'ilu nediya'lu nú lecaxi necha nú acu bene xitse, pero mejora li'itsialu cuna Diose nediya'lu nucua'. Li'á nia nú ñia necha lu cuenda' bene enu racu xitse sin nú za' arquí'lla. ²³Pero bene enu sa' arquí' equie nú racu, xne tunu para li'illa dula necha nú acullae nu racullae chequie e'cuñialla rri'illa dula equie nú rri'illa elliebacu' nú la necha nze'ca nú rri'illa. Ye nú rri'illa nu sa' arquí'lla chenu rri'illae rri'illa dula che.

Rquí'ña nú ria'ahua lunú riu' arquí' sa'ahua

15 Lia'ahua enu nzuta' arquia'ahua lunú nzeli arquia'ahua Jesucristo rquí'ña nú ria'ahua elietsa lubee bene enu lasca' tsuta' arquí' lunú nzeli arquí' Jesucristo luhua nú ria'ahua lunú niarquí'tsia'ahua. ²Sino que ye'ahua rquí'ña nú la'na'ahua nú ñia tsu arquí' bee sa'ahua. Nu rquí'ña nú ria'ahua lunú seca beella nú necha nze'ca, para nú ria'ahua elietsa lubee nú nzeri'ilábeella beya' xneca riala chenala beella inziu' Diose. ³Xne ni' Jesucristo né ri'i tucu nú niarquí'tsianu sino que unga tucu nú nequie lu ichi' Stichia' Diose elu rni: "Li'á

uyucu'a ye bee bedichia' chi'qui' nú riala ni bee bene lulu." ⁴Ye nú nequie lu ichi' Stichia' Diose hasta hua'tu nequiene para nú ria'ahua beya' xneca huañia'ahua, nu equie cuenda' Stichia' Diose nze'ta nú rlu'cua'ahua paciencia, nu la llaca'ahua telluaquie'ahua lunú nelluaquie'ahua nú atia'ahua. ⁵Diose enu rri'i nú rlu'cua'ahua paciencia, nu rri'i elietsa lua'ahua para nú la llaca'ahua, li'inu ri'inu elietsa luhua para nú huañihua nu aca tucunecatsehua cuna beelá bee sa'ahua tucu nú uri'i Jesucristo. ⁶Para nú yehua tucutse nihua bedichia' nze'ca lu Diose, pa' Jesucristo.

Riene' bee bene enu laca bee bene Israel Stichia' Diose

⁷Enze'e scua tucu nú uyucu Jesucristo li'ihua nú necha bee bene'nu, le'ca scua uri'ihua lu ye bee sa'hua enu nzeli arquí' Jesucristo, equie nú rlu'cuhua ula'na lu Diose. ⁸Nia luhua nú ube'ta Jesucristo lu iliulabe para nú uzete'nu Stichia' Diose lubee bene Israel nu scua ube'tanu uzibi'nu lubeella che scua uyalu tucu nú ucuaqui u'na Diose lubee bene'ahua enu udetela nu scua unga achee nú Diose sí sa'alunu stichia'nu. ⁹Nu le'ca ube'ta Jesucristo lu iliulabe para nú equie cuenda'nu nu'bee bene enu laca bee bene Israel nibeella bedichia' nze'ca lu Diose xne rua'a arquí'nu li'ibeella, tucu nú nequie lu ichi' Stichia' Diose elu rni: Hasta lubee bene enu laca bee bene Israel nia nú ñia nze'calu,

nu le'ca ulaa bee canto nu ñia ni
lu cuenda'lu.

¹⁰Le'ca rni stucu luhware Stichia'
Diose:

Li'ihua enu laca bee bene Israel,
ñia utsu arquihua tucu nú ñia
nzu arquí' bee bene Israel.

¹¹Nu stucu luhware Stichia' Diosé
rni:

Ye bee bene enu laca bee bene
Israel uni'hua bee bedichia'
nze'ca lu Diosé Pa liñibe.
Cuna yebeelá bee bene iliulabe,
uni'hua bee bedichia' nze'ca
lunu.

¹²Le'ca uni profeta Isaías:

Lu familia' Isái chiu'u tucu
bene enu nibiya' lubee bene
iliulabe,
nu hasta bee bene enu laca bee
bene Israel chili arquí' li'inu.

¹³Diosé enu rri'i elietsa lua'ahua
nú nzeli arquia'ahua, ri'inu nú
ñia nzu arquí'hua nu ri'inu nú
nzuxe arquí'hua lubee sa'hua xne
nzeli arquí'hua li'inu, nu equie
cuenda' Espíritu Santo chiqui'
nucua'aqueihua lunú liqui'nu
lua'ahua.

¹⁴Bee sa'a enu nzeli arquia'ahua
Jesucristo li'á nediya nze'caa nú
rri'i nze'cahua lubee sa'hua, nu
chiqui' recahua hasta rnihua bezete'
lubee sa'hua nu sete'hua bee sa'hua.

¹⁵Añinzuca nú scua nu'bee luhware
lu carta quie' uquie'a bee bedichia'
nú fuerte rcu arquí'hua unia luhua
nú xneca huañihua nu li'á rnia scua
luhua equie cuenda' poder' Diosé
nú uliqui'nu lua. ¹⁶Para nú zibi'a
lu Jesucristo nu ixiule'a bedichia'
nze'ca' Diosé lubee bene enu laca
bee bene Israel para nú huañibeella

tucu nú niarquí' Diosé nú huañi
beella, nu la lu'cu beella dula ante
Diosé equie cuenda' Espíritu Santo.

¹⁷Nu xiquie nú rni nze'caa lu
cuendaa como bene' Jesucristo
nú necaa equie nú sibi'a lu Diosé,
¹⁸pero lecaxi aca nia nu rri'á tunu
leca nú rri'i Jesucristo elietsa lua,
xne li'inu rri'inu elietsa lua para
nú ri'á elietsa lubee bene enu
laca bee bene Israel para nú chili
arquí'beella Diosé nu zucu' beella
stichia'nu, nú nzelila arquí'beella,
equie nú unila lubeella nu lunú
rla'ñi' beella xneca nehuañia.

¹⁹Nu le'ca xne ulañi'la'hua ye bee
milagro cuna ye beenú uyanu
arquí'hua unga equie cuenda'
Espíritu Santo. Che scua udixiule'a
bee bedichia' nze'ca' Jesucristo
yebee luhware, desde Jerusalén
nu hasta lu iliu nú lee Ilríco.

²⁰Xne scua neca elliebacu' nú
rri'á, nú ixiule'a bedichia' nze'ca'
Jesucristo. Pero la ixiule'ene elu
uquixie rixiule'ela benene sino que
rixixiule'ene elu lasca'lí yene' bene
equie cuenda' stichia' Jesucristo.

²¹Tucu nú nequie lu ichi' Stichia'
Diosé elu rni:

Bee bene enu lasca' yene' equie
cuenda'nu chulu beella
li'inu,

nu bee bene enu lasca' ri'i beya'
equie cuenda'nu ri'ie beella
beya'.

Uri'i Pablo elliebacu' nú nzalla Roma

²²Lunu uya'a ye bee luhware
elu unila luhua nú nza'a enze'e lá
llucha'a ayelabi'ya li'ihua añinzuca
nú huaxi bese uniarquia ayelabi'ya
li'ihua. ²³Pero nee lunú ula'xulá

rixiule'a Stichia' Diose ye bee luhuare ca'a nu como hasta hua'tu niarquia nzelabi'ya li'ihua, ²⁴enze'e nee rri'á elliebacu' nú nzelabi'ya li'ihua chenu nza'a España. Nu chenu nzelabi'ya li'ihua, nu chenu udetela bee bichia nú ñia nzu arquia nú ubelabi'ya li'ihua, che ri'ihua elietsaa nú nza'a España. ²⁵Pero nee rluti nza'xua Jerusalén nzeyua elietsa lubee sa'ahua enu nzeli arquí' Jesucristo nucua'a ze'e. ²⁶Xne bee bene lu iliu Macedonia cuna bee bene lu iliu Acaya enu nzeli arquí' Jesucristo uri'i beella elliebacu' nú quiete' sa'beella melu nú dete' beella lubee bene enu seca elitsi nucua'a Jerusalén, enu le'ca nzeli arquí' Jesucristo. ²⁷Nu elliebacu' e'cubeella uchiu'u nú xe'lla beella elietsa cua', añinzuca nú scua riala ri'ibeella lubee bene Israel xne neca xi neca nú nezi'qui beella lubee bene Israel xne equie cuenda' bee bene Israel uriña Stichia' Diose lubeella, nu nee li'ibeella enu laca bee bene Israel, neca nze'cae nú ri'i beella elietsa lubee bene Israel cuna lunú rlu'cu beella. ²⁸Enze'e chenu la'xua lunú rri'á nu detecuendaa elietsa cua' lubeella, che nza'a España nu chenu dete'a lachihua che nzelabi'ya li'ihua. ²⁹Li'á nediya nze'ca nu chenu nzelabi'ya li'ihua nu' huaxi nú nia luhua equie cuenda' Jesucristo.

³⁰Nee equie nú ye'la'ahua se'cala'ahua Jesucristo, nu equie nú seca Espíritu Santo lia'ahua nacua luhua nú ri'ihua elietsa lua nacua'ahua lu Diose equie cuendaa. ³¹Na'cuhua lu Diose nú ri'inu

elietsa lua chenu nzua leta bee bene Judea enu lá chili arquí' Jesucristo, nu le'ca na'cuhua lunu nú bee sa'ahua enu nzeli arquí' Jesucristo bee enu nucua'a Jerusalén, yucu beella elietsa nú nza'a nzetsa'na para li'ibeella. ³²Enze'e tunu zela Diose nú acane scua che ñia nzu arquia nzelabi'ya li'ihua, che nu' beya' tselachia diquila nú nzua cuna li'ihua. ³³Nu Pa'ahua Diose enu rliquí' nú nzuxe arquia'ahua nzu cuna li'ihua. Amén.

Uxe'la Pablo saludo

16 Nee nú nza Febe lachihua una'a enu neca sa'ahua enu nzeli arquí' Jesucristo, nu sibi'lla li'ñi Indu nú nzucu eyeche Cencrea. ²Uyucu nze'cahualla lu cuenda' Jesucristo, tucu nú riala nú ria'ahua lubee sa'ahua enu nzeli arquí' Jesucristo. Le'ca uri'ihua elietsa lulla lu xitse nú rqui'ñalla, xne chiquí' uri'illa elietsa lu huaxi bee bene nu le'ca uri'illa elietsa lua. ³Uri'ihua saludar Aquila cuna una'lla Priscila, li'ibeella enu rri'i elietsa lua, nú rixiule'eru stichia' Jesucristo. ⁴Li'ibeella enu hasta uniarquí' ati equie cuendaa para nú la atia, enze'e rdetea che'tsa lubeella. Nu la necane nú li'itsia rdetea che'tsa lubeella. Le'canu bee sa'ahua enu nzeli arquí' Jesucristo enu laca bee bene Israel rdete' che'tsa lubeella. ⁵Uri'ihua saludar bee sa'ahua enu nzeli arquí' Jesucristo, li'ibeella enu riete'sa' ni'i Priscila nu Aquila uri'ihua saludar Epeneto enu rquietea, enu rlutilá uchili arquí' Jesucristo lu iliu Asia. ⁶Uri'ihua saludar María, li'illa enu

chiqui' uri'i elietsa luhua. ⁷Uri'ihua saludar bee bene lachia Adrónico nu Junias, enu ullutsenua ni'cu'. Nu chiqui' seca bee Apóstol li'ibeella, nu rlutilá beella uchili arquibeeella Jesucristo luquela li'á.

⁸Le'ca uri'ihua saludar bene enu lee Amplias enu rquietea enu chiqui' se'ca, lunú necaru bene' Jesucristo.

⁹Uri'ihua saludar Urbano enu rri'i elietsa lua nú sibi'a lu Jesucristo. Le'ca uri'ihua saludar bene enu rquietea lee Estaquis. ¹⁰Uri'ihua saludar Apeles enu ulube' nú neli nzeli arquí' Jesucristo, nu le'ca uri'ihua saludar familia' Aristóbulo.

¹¹Uri'ihua saludar bene lachia enu lee Herodión, nu le'ca uri'ihua saludar familia' Narciso, li'ibeella enu le'ca nzeli arquí' Jesucristo.

¹²Uri'ihua saludar Trifena cuna Trifosa, bee una'a enu sibi' lu Jesucristo. Le'ca uri'ihua saludar Pérsida, una'a enu nediya'ahua nú chiqui' uzibi' lu Jesucristo.

¹³Uri'ihua saludar Rufu, enu neli nzeli arquí' Diose nu le'ca uri'ihua saludar na'lla, bene enu se'caa tucu nú se'caa naa. ¹⁴Uri'ihua saludar Asíncrito, nu Flegonte, Hermas,

Patrobas, Hermes cuna beelá bee bene enu nucua'a cuna li'ibeella enu le'ca nzeli arquí' Jesucristo.

¹⁵Uri'ihua saludar Filólogo, Julia nu Nereo nu cuna zanalla, nu le'ca uri'ihua saludar Olimpás cuna beelá bee bene enu nucua'anu beella, enu le'ca nzeli arquí' Jesucristo.

¹⁶Nu li'á nia luhua: Nú uni'hua Diose lubee sa'hua tucu nú ríalá nú ri'ihua, nu ca'a yebée sa'ahua enu nzeli arquí' Jesucristo xe'labeella saludo luhua.

¹⁷Bee sa'a enu nzeli arquia'ahua Jesucristo zequiaa nu nacua luhua, nú bi'yahua li'ihua lubee bene enu rri'i nú rle'sa'a bee bene, nu sequienubeei bee bene. Xne urene sete'bee bee bene luquela nú ungahua nu la ri'icasohua beei. ¹⁸Xne li'ibeei la zibi'bee lu Jesucristo, nu li'ibeei rri'ibeei lunú niarquitsiabeei, nu cuna bee bedichia' nú ñiase nu cuna bee bedichia' nze'ca nú rnibeei rri'ibeei ana bee bene enu la chulu Stichia' Diose, urre bee bene enu apena uchili arquí' stichianu. ¹⁹Pero yebée luhua nediya' bee bene nú neli sucu'hua Stichia' Diose nu nzenalahuane nu ñia nzu arquia, nu niarquia nú cua'atsiñahua ri'ihua nú neca nze'ca nu ubi'yahua li'ihua para nú la ri'ihua nú necha neca. ²⁰Diose enu rri'i nú nzuxe arquia'ahua li'inu ri'inu elietsa luhua para nú la ria' beze'lu ana luhua nú ria'ahua dula nu Jesucristo enu rnibiya' ri'i nú cha nze'ca lu cuenda'ahua.

²¹Timoteo enu rri'i elietsa lua, nú rixiule'eri Stichia' Diose xe'lalla saludo luhua, le'ca esquie bee bene lachia enu lee Lucio, nu Jasón, nu Sosípater xe'la saludo luhua.

²²Tercio enu rquie'e stichia'a lu carta quie' le'ca xe'lalla saludo luhua equie cuenda' Jesucristo.

²³Le'ca xe'la Gayo saludo luhua, nu ni'lla nzucua'a nu le'ca sana'lla ni'lla riete'sa' ye bee sa'ahua enu nzeli arquí' Jesucristo. Nu Erasto enu neca Tesorero eyeche quie' cuna sa'ahua enu nzeli arquí' Jesucristo lee Cuarto xe'labeella saludo luhua.

²⁴Nu Jesucristo ri'i nú cha nze'ca lu cuenda' yehua. Amén.

Nzelaxula nú rni Pablo lu carta quie'

²⁵Dete'ahua che'tsa lu Diose xne rri'inu elietsa luhua, nú nze acaláhua nu nzeri'iláhua beya' lunú nzuta' arqui'hua lu bedichia' nze'ca' Jesucristo, tucu nú uzetela li'ihua nú xneca tsila'ahua, xne scua neca elliebacu' Diose hasta chenu lasca' quixie iliulabe, elliebacu' nú lá ri'i bee bene beya' desde chenu uquixie

iliulabe. ²⁶Pero nee nediya'la'ahua elliebacu' Diose nu uri'ila'ahua beya' equie cuenda' ichi' nú uquie'e bee profeta tucu nú unibiya' Diose lubeella enu rlu'cu elunehuañi nú la laxu nu ye bee luhuare riene' bee bene Stichia' Diose, nú uquie'e bee profeta para nú chili arqui' bee bene Jesucristo nu zucu' bee bene stichia'nu. ²⁷Tucutsia Diose enu reca yeene. ¡Chiqui' riala nú lu'cua'ahua ula'na lunu, ye tiambu equie cuenda' Jesucristo! Amén.